

ASO LULU, 19 IANUARI 2022

Na toe faaauau Taulumaga a le Fono Aoao Faitulafono i le itula e 6:00 i le afiafi.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2021/2022.

FOFOGA FETALAI: Ou te faasilasila atu ua toe amatalia nei Taulumaga a le Fono Aoao Faitulafono.

Ua faliu le la i lona tauafiafi, ae i ai le manatu ua pale i Atoa le faauo a Tui ma le Fatutoa e pei o le upu ia Tae-o-i-Atua. E talitonu ua maua foi le malosi e faaauau ai le tatou galuega mai le malologa sa feagai ai ma le mamalu o le Palemene i lenei aoauli. Malo le onosai.

E faataatiaese Galuega i le itula e 1:00 i le aoauli o lo o saunoa le sui usufono mo Faleata Nu.4. O lea ou te tapa ai ma le faaaloalo lau Afioga i le sui usufono mamalu e tulai mai e faaauau lau saunoaga.

Afioga Peseta Vaifou Tevagaena: Lau Afioga i le Fofoga Fetalai, pe a maua se avanoa.

FOFOGA FETALAI: Ia, pe i ai se... Ua uma ona e saunoa pe i ai se mataupu...

Afioga Peseta Vaifou Tevagaena: Lau Afioga, o le mea e fia faasao lau Afioga i le saunoaga a le Afioga i le sui usufono mamalu, ona o le taimi analeila lea sa faaiuiu ai le saunoaga e uiga i se auala a si ona itumalo ma tuuaia ai lou nei sui usufono na faia. E leai leaga o lea e mau i faamaumauga, ae na o se mea e fia faasao lau Afioga pe talia. Ma lou faaaloalo lava.

FOFOGA FETALAI: Oi, ia o lea ua maua le saunoaga a le sui usufono mamalu mo Faasaleleaga 5.

Ia, o lea la ua e saunoa mai e le o lau Afioga sa faatinoina...

Afioga Peseta Vaifou Tevagaena: Lau Afioga, leai e taua foi le tuuaiga i se isi itu, ae na ona ou faapea atu, ia o la e afio mai le Minisita o Galuega e

malamalama lelei lava ia i latou na faatinoina galuega nei. Ma o le 10 nei o tausaga lau Afioga e le o toe resitalaina le pisinisi a lau fanau i galuega a le LTA, leaga o lea e le o afio mai le Tamaitai Pule, ma atonu o lea e matau mai le Afioga i le Minisita o Galuega.

Ae talu ai ona o lea ua taua lou igoa, a o lea sa ou i fafo, ia ne i faamau i totonu o faamaumauga a le Maota, ia atonu foi o le taua foi o le tuuaiga a le sui usufono mamalu, se i silasila i ai le Afioga i le Minisita i le kamupani la nei e le lelei le faatinoina o galuega a le tatou Malo. Ona o le mea tonu lava lea na avatu ai lau tuualalo i le Afioga i le Minisita o Tupe, leaga sa ou manao e tuu atu sao atu lava i le Afioga i le Minisita o Galuega, ae leaga e le i afio mai le Minisita o Galuega, i le tulaga la lea o le tupe lea o le maintenance fund, faatatau la lea a o faaletonu galuega a le Malo a o i ai se alagatupe e tua i ai le Malo. Ia, atonu e i ai se taimi faalautele atu sou manatu, ae na ona ou fia faasao le mea lea, lau Afioga e leai e le o au lau Afioga lea na faia le galuega. Ma lou faaaloalo lava faafetai.

FOFOGA FETALAI: Ia, o lea ua maua le finagalo o lau Afioga. Faafetai. O le mea taua o lea ua aoga foi lou saunoa mai lea foi e faafogafoga atu le sui usufono o lo o saunoa. Ia tailo i ai i se faauiga a lau Afioga, a o le matau a le Nofoa o lo o taua o le kamupani a Peseta. Lona uiga e le o tuuaiina e Ale lau susuga o le sui usufono, o le kamupani e pei ona ia taua. Ia atonu o lea ua e saunoa manino aua e te popole e le o afaina lava le kamupani a Peseta. O le mea lea, malo faafetai.

Ia, tulai mai lau Afioga i le Minisita pe i ai se i ai sau fesoasoani.

Tofa Hon Olo Fiti Afoa Vaai (Minisita o Galuega, Felauaiga ma Atinae Eseese): Lau Afioga, leai na ona fesoasoani atu i le mataupu lea. E tulai atu ma le faaaloalo e faamaonia le saunoaga a le sui usufono mamalu, e leai sana kamupani fai auala, ae na o lana kamupani fai malae vaalele.

FOFOGA FETALAI: Ia, o lea ua maua, ne i toe faapopoleina lou finagalo i lea tulaga, ae le o se isi foi.

Afioga Peseta Vaifou Tevagaena: Lau Afioga i le Fofoga Fetalai, o le auala lea na ou talanoa atu ai e le o le malae vaalele. Leaga sa ou manatu lava o le afioga i le Faleomavaega, ae a saunoa mai o le a faaauau le malae vaalele i tua i Tiavea.

FOFOGA FETALAI: Ia lelei, faatea ia ia tulaga. E faamalulu atu foi i lau Afioga i le sui usufono mamalu, atonu o lea lava e faafogafoga mai le sui usufono sa ia taua, ia atonu o lea foi ua malamalama lea mataupu. Ae saunoa maia lau Afioga i le sui usufono mamalu mo le faaauauina o lau

saunoaga. Aua ne i toe foi i tua ma le umi o le tatou fonono ae faaauau lau lauga.

Tofa ALE VENA ALE: Faafetai i lau Afioga i le Fofoga Fetalai. E malolo le tatou galuega o lo o taumafai atu lou nei sui usufono aua manaoga o lou itumalo. Ua maea foi ona ou faanoinoi atu i lau Afioga mo manaoga uma o lo o fia faaooina atu i Afioga i alii ma tamaitai Minisita, ia e auala atu lava i lau Afioga i le Fofoga Fetalai, o ala o mea.

A o le i faaauauina lau lauga i lenei afiafi, o le mataupu Peseta lea na laga nei, e leai, e faamalulu atu i lau Afioga i le sui usufono, leaga o lea e te le i alaala mai i i. Ou te le i fai atu o oe, na ou fai atu, pei uma lava, maybe, ae le faapea ua ou fai atu o oe. Afai lava la e le o oe, ia ua mama oe, e leai se mea e te atugalua ai lou finagalo o lea foi ua saunoa le Minisita o Galuega e leai sau kamupani fai auala na o le kamupani fai malae vaalele. Ia toaga lava oe e fai malae vaalele.

Ia, lau Afioga i le Fofoga Fetalai, e maea le taimi faatulagaina foi o le tatou galuega nei i le aoauli, o lo o taumafai atu se talosaga vaivai i le Afioga i le Minisita o Galuega e tusa ai ma auala ia i le pitonuu lea o Safune i lou itumalo, e faapea foi i i le itulua o Satunumafono, i totonu lava ia o taloto o lou nuu tau Toamua, ona o auala ia o lea e agai i maota ma laoa o lo o alaala ma papaaao ai le toatele foi o lenei nuu ma lenei itumalo. E faapena foi la i i le auala lea i le afioga foi o si ou nuu o Saina. Ou te tatalo atu ma le faaaloalo tele i lau Afioga i le Minisita e te alofa se i e silasila totoa ane e vave foia ia faafitauli.

Ia, ona ou oo mai lea i le Afioga i le Minisita, lau Afioga i le Sui Palemia, le Afioga i le Minisita o Tiute. E momoli atu le faamalo ma le faafetai i le fitaituga o lau Afioga i le Minisita faapea foi le Afioga i le Minisita Lagolago e tusa ai foi ma le siitiaga o tulaga ua agai i ai fuafuaga aua le faaleleia o le Ofisa o le Tiute. Ae se i ou fesili atu lava i lau Afioga, o le a le mea ua oo i le scanner? Afai o tau hesitate lau Afioga i le aumaiga o le masini lea, ou te fautuaina lau Afioga ma le Kapeneta ma le faigamalo, e tatau ona aumai le masini lea. O le masini lea o le a faaitiitia ai soligatulafono i mea ia e lau mai o, aua e leai lava se isi mea e sao mai ai mea ia o aisa, o illegal weapons nei, fana tetele taavili ma a ituaiga fana, e omai uma lava i totonu o container. Ae a i ai le scanner lea, na o le alu lava o le container i totonu o le masini ii le mea, ia, toso le container lea i o, sema se taimi o le Tiute e matua talepe ai i fafo ae lau uma mai mea po o a mea la e i totonu. O le taua lena o le i ai o le scanner. Afai la o tau mafaufau lau Afioga i le aumaiga o le scanner, ou te fautuaina lau Afioga ma le Matagaluega mo le faaitiitia o galuega a le Ofisa o le Tiute ma le faaitiitia foi o soligatulafono, e tatau, it's a must. E tatau ona i ai le tatou scanner lea. E faigofie uma lava ia galuega, ma o le a nofo uta foi la i ai le au container lea e lau mai fafo ma fai le amioga mataga lea o le aumai o mea nei e faasolitulafono. O le a matua aware i ai ma o le a

le toe i ai foi ni soligatulafono faapea e faia aua foi o lea ua i ai le masini a Samoa e detect uma ai mea uma nei. E le toe i ai la ni mea e toe laua mai i inei, ma o le a faigofie foi ma tulafono a le tatou Malo. Ia, o le tuualalo atu lena i lau Afioga i le Minisita o le Ofisa o le Tiute.

Lau Afioga i le Minisita o Faatoaga, ia se i ou toe foi mai i ai leaga o lea e le o i i.

Lau Afioga i le Minisita o Faiga Palota, o le a ou le agai lava i isi itumalo o le atunuu, a o le faatalauula a lou nei sui usufono, ona o le itumalo lenei o Faleata Nu.4. Ou te talitonu o le a i ai se isi Komisi e faatulagaina ai itumalo faapalota. O le itumalo lenei o Faleata Nu.4, o Saina, o Toamua, le itulua o Satunumafono, o Safune, Puipaa ma Utumaavaava lea e tuaoi mai o ma le Metotisi. O le talosaga la a lou nei sui usufono, ia toe silasila le Malo e toe vaeluaina le itumalo lea o Faleata Nu.4. O mafuaaga nei, a silasila i ai i fanua ia e i Toamua uta ma le 280 eka lea estate a Retzlaff lea ua amata ona faatau, lea ua nofoia nei e le paia ma le mamalu o le autovaa mai o le atunuu. A o le tatou Tulafono foi lea ua i ai nei, ua e agavaa e te palota i le mea e te nofo ai. Ma o lau vaai atu i le tusigaigoa lea faatoa mavae atu nei ia i latou ia o le a ono palota i le palota lea o le 2016, afai e sao le faatulagana lea, o lona uiga toetiiti 6,000 le lola palota a le itumalo lenei o Faleata Nu.4 ona o le toatele o le itumalo.

O lau tatalo la i lenei taeao, afai o le a toe fetuunai le tuaoi o faiga palota, ia, se i silasila ane i le talosaga a lenei itumalo. Faleata Nu.4: Saina, Toamua, le itulua o Satunumafono. Faleata Nu.5 pe a tusa ai: O Safune, Puipaa ma Utumaavaava. Ia taatia atu i ina i le faautautaga a lau Afioga i le Minisita. E faapea foi le tatou faigamalo ua tulai mai nei.

Lau Afioga i le Minisita o le Soifua Maloloina, e momoli atu le faafetai tele. E leai sau faitio i le Matagaluega lea, na o le faamalo lava ona o le tele foi o fitaituga i tiute ua siitia ai le Matagaluega, aemaise lava o le puipuiga lea o le koviti-19 ma le faamai, aemaise lava i gasegase ia ua maua, na maua e le koviti, i le vave foia e lau Matagaluega a o le i pipisi tele atu i lo tatou atunuu.

Ma e momoli atu le agaga faafetai. A faaauau pea le mataala o lau Matagaluega aua o le mea lava lea o lea e mataitu nei, ia aua lava ne i oo mai le faamai lea i totonu o le tatou atunuu. O lea foi ua i ai le isi faamai fou lea ua agai mai. Ia ma e momoli atu le agaga faafetai i lau Afioga i le Minisita o le Soifua Maloloina.

Lau Afioga i le Tamaitai Palemia ma le Aiga Kapeneta, o le tatou Faavae o le tatou Malo, lea o le a 60 tausaga talu ona tutoatasi Samoa. Pe le i alagataua ea i le taimi lenei o le Paeaiga lenei Lona XVII ona tatou toe asiasi i le tatou Faavae? Ou te manatu e tatau ona fai se review atoa lava o le Faavae e toe silasila totoa i ai le Maota lenei o le Palemene, e amata mai le tofiga o le Ao Mamalu o le Malo faasolo mai ai. Aua a matau atu foi i fatia ua sola ma tulaga foi o le faatasinaina o le Ao o le Malo, ia, o le agaga lena e soso

atu ai ma le faaaloalo tele i lau Afioga i le Tamaitai Palemia, le Aiga Kapeneta ma le tatou Maota o le Palemene. E tatau ona tatou toe silasila i le tatou Faavae. Aua a matau atu i le 1960 lea na i ai le tatou Faavae, tutoatasi le tatou Malo i le 1962, o lea o le a 60 tausaga. Na pau lava le mea lea sa faagasolo mai ai, na o le teuteuga lava i ni nai vaega o le Faavae e manaomia. Ae pe le alagatau i le taimi leni ona toe silasila i le tatou Faavae, aemaise lau Afioga o le tofiga o le Ao o le Malo. O le a ea le uiga o le tofiga o le Ao o le Malo? Tulou lava o le upu e to ia te au, e le o matafaioi ea patino e tatau ona umia e le tofiga o le Ao o le Malo i lalo o le Faavae, o lana Afioga i le Ao o le Malo e tatau ona mataituina galuega a le Maota leni o le Palemene, le Palemia ma le Kapeneta ma le Faamasinoga? A o le tulaga lea e i ai i le taimi leni, e le o lena. O le Palemia e na te fautuaina le Afioga i le Ao o le Malo. A i ai foi se Tulafono po o le a lava se mea e tuuina atu i Lana Afioga, e leai lava se mea e tasi e mafai ai ona faia sona finagalo e faatatau i se mataupu. A le manao foi e sainia se Tulafono, e toe foi mai i le Kapeneta, 7 aso pasi. O le a le uiga o le tofiga o le Ao o le Malo lea tatou te faamemelo nei i ai?

Le paia e o le Afioga i le Palemia ma le Aiga Kapeneta ma le tatou Maota, a vaavaai atu i tua i le gasologa mai, tulai mai Tama a Aiga, Afioga ia Mataafa, le tuua o Fiamē, Malietoa Tanumafili ma Tupua Tamasese. E tasi le tausaga talu ona Ao Soofaatasi Malietoa ma Tupua Tamasese tuumalo Tupua Tamasese, tauave toatasi mai ai e Lana Afioga, le Susuga i le Malietoa le tofiga o le Ao o le Malo, leai se mea e tasi e gase. A silasila foi i ai i fesuaiga Malo lea na i ai nei, e leai lava se isi e fesiligia. Na ona fai lava o le Tala o le Tupe pa u, sau le feau, ia malolo oe, sau le tama lea. Malama le taeao ua uma ona faatauto le isi Palemia. Ae a le taimi leni? Ua fesiligia uma mea uma, ona o le a? E le o malulalotao le tatou Faavae. E oo foi i le Tulafono lea o le 45 aso, ua umi tele na taimi e tauaofia ai le Palemene pe a uma le faiga palota. Ioe. Aua o lea tatou te matauina i le taimi leni, e lua vaiaso tolu vaiaso ua uma le galuega a le Ofisa Fai Palota, ua uma le final count. Ia ua tatau ona usu le Fono a le Palemene. E ala ona tosotosololoa o le le maua o le numera. Ae tatau at least 30 days and Parliament must not delay to convene. O ia mea uma lau Afioga, e le o atoatoa i totonu o le tatou Faavae ma le Tulafono. Ae a tatou toe asiasi i le tatou Faavae ma matua faamaioio lelei Tulafono, o i ina e le toe i ai ni finauga e toe fai i ni mataupu e tulai mai. O le faafitauli tele lea sa faafeagai ma tatou i fatia ua sola, ia ua maea na taimi, a o le tele ia o le aoga. O le aoga tele lena mo le tatou Paeaiga leni o le Palemene leni ina ia fai ma silasila mamao i ai a outou Afioga, ina ia fai se faiga e foia ai. Aua a oo loa i le taimi leni ua tulai mai vesiga faapenei ae le mautonu le Faavae ma le Tulafono, ia ona taaalo loa lea o faiai o loia e faatino ai manaoga o le polokiki, o le mea aupito sili lena ona leaga.

Ia, lau Afioga i le Tamaitai Palemia ma le Aiga Kapeneta, le tatou faigamalo ua pale mai nei, ia o le tatalo atu lena a lenei itumalo, tuu atu i outou autafa e silasila totoa i ai ina ia matagofie le tatou galuega, ia faafaigofie mea uma i le taimi e tulai mai ai fita ma faigata, ma aua ne i toe aliaie mai ni faafitauli pei o mataupu sa tatou savalia mai nei.

Ia, o lea ou te vaai atu o lea ua afio mai le Afioga i le Minisita o Faatoaga. Lau Afioga i le Minisita o Faatoaga...

FOFOGA FETALAI: Ia se i avatu pea se fesoasoani a le Nofoa a o saunoa le sui usufono mamalu. O le mea sili o lea ua maea le fautuaga pei ona tuuina mai, ae talu ai foi, o lea ua manaia lava lou finagalo e toe asiasi i le Faavae. Ae talu ai ona o lea ua taua Le Ao o le Malo, o itu na o lea e popole i ai le Nofoa. E tele lava se galuega tatou te vaavaai i ai ae tatou puipui i le tulaga o i ai nei Le Ao o le Malo ina ia aua ne i faapipiia mai i mea na tutupu.

O le uiga lena o le fautuaga i le sui usufono mamalu, o lea ua oo mai le fautuaga, ia taatia lava i le faigamalo e silasila totoa i tulaga ia, ma e le fou lenei mataupu, o lea ua 60 tausaga o tatou tutoatasi, ua uma foi ona tapena e o tatou tuua ma matua ma taitai ua tuanai atu le agai i luma. O le mea lea, ia o lea ua oo mai, a o le popolega o le Nofoa, aua le faapipiia i ai ni mea sa tutupu. Ua uma foi ona fai i ai le faaiuga a le Nofoa aua tatou te toe tepa i tua, tatou agai i luma, tatou savalivali agai i luma.

Ia o se fautuaga lea i le sui usufono mamalu, ae faaauau mai lau saunoaga, o lea ua e see ese ma le mataupu lea.

Tofa ALE VENA ALE: Faafetai i lau Afioga. Afai foi o le a se faafofogaaga a le tatou Maota nei vaetu le faafogafoga a Samoa, ia malu ave i fale i o outou finagalo. A o le manatu lava ia o le sui usufono o Faleata Nu.4, o se mataupu e tataua ona ou avatua i luma o le Palemene ina ia silasila totoa i ai. Ae faafetai mo fautuaga i lau Afioga. Ia o lea ua taoto atu le tatalo i le Malo, e faimea faalogo lava i le tatou Malo ua pale mai nei, po o fea o i ai le latou tofa liuliu ma le faautautaga, ia o lena tatou te savavali ai i lenei Paeaiga. O le matafaioi lava lea a sui usufono o le Palemene o le faufautua atu i le faigamalo mo tatou foi taimi, o a uma mea tatou te manatu e faaleleia ai le auaunaga ma le tautua ia Samoa ma le tatou atunuu, ia e le mafai ona oti i tua se manatu, e tataua lava ona avatu i luma. Ae faafetai i lau Afioga i le Fofoga Fetalai, ua talia foi ma le faaaloalo tele lau fautuaga.

Lau Afioga i le Minisita o Faatoaga, e momoli atu le faafetai tele lava i le vaavaai atu i le tele o le tulaga ua oooo i ai lou finagalo i faaeleeleaga a le atunuu, e le gata i le auina atu i maketi i fafo, ae pau lava lau tuualalo i le maketi lea i Tutuila, ia pei o le tele lava o taimi lea sa avatu ai tatou talo foi i Tutuila, ia lea ua faatulagaina mai na o le 50 taga talo i le pemita. Ae i ai la le mea lea ua query mai e Tutuila lau Afioga, ua avatu nei le mea e tataua

ona tai 25 kilo i le taga, 50 taga, ae ua fai atu nei e tatou ua faapenei le taga ua toetiiti 4 taga talo lea e i totonu o le mea lea, ua 50, ua fai foi lele ua 50 taga. E talosagaina lau Afioga ina ia toe feutagai foi ma le Malo i Amerika Samoa, aua o le matua tele lava o le demand o faaeleeleaga a le tatou atunuu e manaomia mai Amerika Samoa. E le gata foi i le talo ae faapena le fai, ia ma fualaaui aina lau Afioga. Ia, e pei o le tuualalo atu lena i lau Afioga i le Minisita.

Ia ou te manatu na pau ia o mataupu e afea e lenei foi sui usufono. E momoli atu foi le faafetai tele i le tapuaiga a si ou itumalo o Faleata Nu.4, malo lava faafetai foi tapuai. Le paia i le aufai tatalo ma faafeagaiga taulagi a le tatou nuu, malo lava faafetai. Faafetai foi mo tatou fonotaga. Ia lena ua lafo atu i le tatou itumalo le filifilia o tatou Komiti, Taitaifono le sui usufono, 14 i le Komiti. E le manao foi le sui usufono e pule toatasi i nei mea, aua e uma foi tou tuuai foi ia te au. Lafo atu i Afioga i alii Suafa ae se i faagasolo le tatou galuega pei ona i ai le faatulagana a le faigamalo o le tatou poloketi lea, aua le atinae o le tatou Malo lea o le a faamuamua i ai le tatou faleaoga.

Lau Afioga i le Fofoga Fetalai, o le tatou Tala o le Tupe o lo o i lumamea nei o le Maota, e matua lagolagoina e lenei sui usufono o Faleata Nu.4. Le paia i le tapuaiga a lo tatou itumalo, aemaise foi le tatou itumalo o lo o faafogafoga tapuai mai fafo i atunuu e mamao, e le faagaloina lava la outou tautua matavela, aitaumalele mai i tatou aiga ma nuu, aemaise o le tatou Malo. E leai lava se mea e tuia ai lou finagalo, it's a freedom of speech, ae ia manatua foi, o lo o i ai lava Tulafono o lo o limataitaiina ai le faaogaina o upega tafailagi. O le mea la lea i lenei taeao, o le a foi se upu ua laavale i lau Afioga i le Fofoga Fetalai ma le faafogafoga a lenei Maota, ia faamagaloi mai le auauna e tusa ai ma lenei faatauvaa. Ia manuteleina i le alofa o le Atua le faagasologa o galuega i lenei foi amataga o le tausaga, ia maua le soifua o lau Afioga i le Fofoga Fetalai, soifua manuia i lau Afioga i le Tamaitai Palemia ma le Aiga Kapeneta, sui usufono mamalu uma o lenei Palemene, ia maua so outou finagalo aua le tautuaina o Samoa ma le tatou Malo.

I tulaga foi o le apulu i tofaga ma le falaefu i le Afioga i le Taitai foi o lenei Vaega Faaupufai, ia taulu taulu le finagalo o le Atua toe faafoisia lona malosi. Ia agalelei le Atua. Faafetai.

FOFOGA FETALAI: Malo faafetai. Ia, ua faamalo saunoa malo foi malele i lau Afioga i le sui usufono lau Tofa i le Alii Matua. E talitonu foi o lea ua faafogafoga ma le totoa le paia o le Maota aemaise foi le Afioga i le Tamaitai Palemia ma le Kapeneta aua foi fautuaga mo le agai i luma o tatou itumalo. Aemaise foi o fautuaga e pei ona tuuina mai ou te talitonu lava o lea o le a silasila totoa i ai le tatou faigamalo. Ia, ae talitonu o lea ua lagolago foi e lou sui usufono mamalu le tatou Tala Faaopoopo o le Tupe. O le mea lea, ia, faamalo saunoa, faafetai mo le fesoasoani mo le tatou mataupu.

Ia, o le taimi lenei o se tasi o sui usufono mamalu... O lea ua matau atu o lea ua tulai mai le sui usufono mo Falelatai ma Samatau. E talitonu foi o lea foi ua tau lou tulai mai, e fai foi sou sao aua le tatou Tala Faatatau Faaopoopo o le Tupe.

Tulai mai le sui usufono mo Falelatai ma Samatau.

Afioga LUPEMATASILA GALUMALEMANA TOLOGATA TOGIA TILE LEIA (Falelatai ma Samatau): E faafetai i lau afioga i le Fofoga Fetalai mo le avanoa. E manatu foi ua maua se faasiligamalosi, a lau afioga ma le paia maualuga o lenei Palemene mai faimalologa na feagai ai.

A e ou te le i sopolia la le malae lea, le malae i Tiafau, le malae o le faautugatagi a Samoa, e muamua ona ou faapai atu i le paia maualuga o lenei Palemene.

I le afio o lau Afioga i le Fofoga Fetalai, afio lau afioga i le Sui Fofoga Fetalai ma le mamalu maualuga o sui filifilia e 51, o lupe lava na faia mai le fuifui o itumalo taitasi.

E faapai atu foi i le afio o lau afioga i le Palemia, le sui Palemia ma le paia maualuga o lau Kapeneta, ae tainane foi le ee papaaao o Ofisa sili o Pulega o Matagaluega ma Faalapotopotoga a le Malo. O le pulega lea.

A e i ai le manatu o paia o le tapuaiga a Samoa, o le a faataalolo. Ua leai lava se vaega o paia o Samoa e le i oo i ai le saunoaga a Tuisamau i le taeao ua sola. Ua uma ona paepae lelei ua leai foi se mea o toe patupatu. A e ona o le faasaoina ona o le toe faasaoina o le taimi, ua ou manatu o le a faataalolo.

A e o le a agai sao le sui o lenei itumalo o Falelatai ma Samatau, e avatu foi nai motugaafa, aua le talanoaina o le Tala o le Tupe ua i luma o le Maota Fono o le Malo.

Lau Afioga i le Fofoga Fetalai, e tauala atu ai se manatu o lenei itumalo, e molimoli atu le agaga faafetai tele i lau afioga i le Palemia ma le Kapeneta ma le Faigamalo. Ua faamalo fia o le faiva, ua tuanai atu lena tausaga. A o lea ua tatou tuvae ma savalia lenei tausaga fou, e le faigofie le ala sa o tatou ui mai ai. O le mea lea e momoli atu le agaga faafetai tele.

Ae le tuua lava le tuualalo ma le matou galuega faa-Itu Agai, e tatau lava ona avatu fautuaga. O le alofa molipo mo lo tatou Faigamalo, aemaise o le tapuaiga a lo tatou atunuu.

E masani ona ou faalogologo i le saunoaga a lau afioga i le tamaitai Palemia, e ese lou fialia pe a e saunoa faapea, e te naunau lava ia maua le tutoatasi o le Ofisa o Faamasinoga. E faapea foi se manatu ma se lagona o lenei itumalo. E lagolagoina le tutoatasi o le faamasinoga. Aepeitai ina ua tulai mai le vevesi lea i le Faamasinoga o Fanua ma Suafa talu ai nei. Sa ou faapea ai o le tutoatasi le o lea tatou te mananao ai. Ia aua ne i aiaina galuega a le Faamasinoga ia le tatou Palemene aemaise o le Pulega. E na o le pau lea o se vaega e tau lagona ai le faanoanoa. A e o le tuualalo o le tuualalo lena. O le manaia o le tulaga o lo o i ai i le taimi nei, aua o lo o i ai lava le Komiti

o galuega a le Faamasinoga o lea foi sa nafa mo le iloiloia ma le tofiaina o le Sui Peresetene, e pei e faapena se lagona. O le tuualalo ia faaauau ai le tutoatasi o le tatou Faamasinoga.

O le tau o le soifuaga e pei ona maua i nisi o saunoaga, e le o po se lilo. Ua oo atu i le 60 pe ova atu foi pasene le siitia o le tau o le soifuaga. E le gata i mea taumafa, ae faapea foi i totoga ma mea e fau ai fale, maota ma laoa. A o le fesili e tuuina atu i lau afioga i le Palemia ma lo tatou Malo. O le a se fuafuaga a lo tatou Malo? E foia ai le faafitauli lea ua tulai mai. O le a se fofu ina ia mafai ai ona toe tuu i lalo le tau o le soifuaga, aemaise o oloa o lo o tulai mai i se tulaga pagatia i le taimi nei?

Lau Afioga i le sui Palemia, malo faafetai mo galuega o feagai ai lenei tausaga. O lea ua i luma o le Palemene le teuteuga o le Tulafono, mo lafoga a faifeau tausinu, faafetai. O se taimi ona oo atu lea o se manatu o lenei itumalo, pe a oo i le taimi e talanoaina ai.

O lau matau mai i lenei tausaga na tea atu. E lua lava vaega tetele o le manifestu a lo tatou Malo o lo o tulai mai nei, sa folafola foi i lenei tausaga ua tuana'i atu. O le Vaega 1, o lafoga a faifeau. A o le vaega lona 2, ua faapea mai le Faigamalo o lo ua i ai nei. A matou tulai mai, matou te aveesea le system foi lea o le TIMS, o lea e faatino ai i taimi nei le aoga o lafoga. Ou te fia malamalama po o le a se tulaga o i ai, po o i ai lava se fuafuaga a le Faigamalo e aveesea ai lea vaega taua. A o lou manatu ma le fautuaga, e tele se aoga o lenei foi system na alu ai le fia miliona a lo tatou atunuu. Aua e le i laititi foi se taimi sa fai ai se suesuega a o tulai mai le Faigamalo a le HRPP i le aoina o tiute. Ae tasi lea vaega taua e fesoasoani i le Malo, aemaise lava le vaitaimi lenei ua feagai ma pagatia, o le faamai ma le mau faalavelave eseese. Ae tele le aoga o le system mo le aoina ma le faamautinoaina, e le o faatogafiti ona fai e pisinisi ma kamupani lafoga e tatau ona ao mai e faatino ai a tatou atinae. O se tuualalo lenei a lenei foi itumalo, afai sa i ai se fuafuaga a le Malo e aveese, se i toe silasila totoa i ai. Ae o le matou lava fautuaga, ia faaauau. A o i ai foi ni vaega e le o atoatoa, o le tatou galuega lenei tatou te vaavaai i ai, faaleleia atili nisi o mea e le o atoatoa ona i ai i le taimi nei.

Na saunoa nisi o sui usufono mamalu i le scanner. Ou te le toe oo se manatu i le taua o le scanner. Ma e lagolagoina foi e lenei itumalo le tatau ona aumai o le scanner. E pau lava le mea lea e maua i si au foi suesuega, o le tele ia o le process o le procurement sa faatino ai le tauofoga seia oo lava ina oo i le taunuuga o le process. O lea ua uma ona tuuina mai le NOL, e aumai e le Faletupe o Atinae o Asia e aumai le latou clear ua tatau ona award le konekarate. Ae peitai o lea e maua ua toe faasolomuli i tua, ua toe agai lo tatou Malo e fai le tauofoga. O le popolega o lou sui usufono ma lou itumalo, e pei ona maua i saunoaga a nisi o sui usufono mamalu. O tupe faameaalofa, o lo o faatino ai. Ma ua leva foi ona tatau ona aumai, o le urgency. Ae a faatelegese pea ma faatuai ona aumai le tatou scanner, e le iloa pe oo atu i le

taimi e toe award ai ua alu i luga le tau. Ae le mailoa foi pe oo atu i lena taimi ua toe aveese le fesoasoani a le Faletupe e pei ona tuuina mai.

O le vaega e sosoo ai, sa ou matamata i le tv, e ese lou aulelei i le tv. I le fuafuaga a lau afioga i le Peresetene ma le tatou Faalapotopotoga o le RSA, e toe faatulai mai le aso malolo o le ANZAC day. O le fesili e fia malamalama ai foi lou sui usufono, e toafia ni tatou fitafita Samoa na maliliu i taua ia tatou te faamanatuina ai? A o le mafuaaga foi na ala ai ona aveese e lo tatou Malo lea foi aso malolo. E le faapea e le taua, e taua. A lea a oo i le aso e faamanatu ai, tatou te o uma i lalo o le uati e fai le sauniga a lotu ma faamanatu. Ae o le talosaga a le aufaipisinisi ua tele tele aso malolo. E afaina ai tupe maua a pisinisi. E pei o le isi lea mafuaaga na ala ai ona tuu ese e le tatou Faigamalo talu ai le aso malolo o le ANZAC. Ae le faapea e le faatauaina, o lo o tumau pea le faatauaina ma le manatua o i latou lea sa maumau ai le soifua.

Ona ou oo mai lea i le Afioga i le Minisita o Faatoaga, ua faamalo fai o le faiva, tele galuega lelei. Ae o lo o faatali pea si o matou itumalo i faamanuiaga o polokalame lea sa amata mai i le la tausaga. O lea sa faapea se i ave le faamuamua i Savaii. Ua maua foi tala fiafia mai le motu i Savaii, o le matua manaia lava, manaia le polokalame. Ae o lo o tuufesili mai si ou itumalo, po o afea ea e oo atu ai le faasologa o lo o latou tatali pea. A e o lea ou te vaai atu i le Tala o le tupe e \$320,000 e le i faaogaina i lena 6 masina ua tuanai atu. Ae o le talosaga a lena itumalo i lau afioga, se i silasila ane i le vaega lea.

O lou fiafia ia i lau saunoaga i le Fonotaga talu ai, i le sailiga o tatou maketi i fafo. Aua tatou te ioe faatasi o le faafitauli lea o lea e tupu. E fai foi o le tatou uunaia o faatoaga ma polokalame ina ia tele fua o faatoaga e maua. Ae alu alu foi, fiu le aufaifaatoaga, pe a oo ina tele le meamata ae le iloa po o fea e ave i ai. E toe faamalosi atu ma..., lau afioga i le Minisita, ia aua le faavaivai. Ia saili pea a tatou maketi i fafo, o lea na amatamea le Faigamalo a le HRPP i lena Paeaiga ua tuanai atu, i le tau faatuina o lo tatou fale i Aukilani, ia ae manaomia lava le vaavaai ai ina ia faaosofia pea le fiafia o le aufaifaatoaga e o e atinae tuamaota ma tualaoa.

E le o po se lilo i le tulaga o i ai le maketi i le taimi nei ma le agai mai i le faaiuga o le tausaga, ua 2 talo i le \$20. Ua fiafia nisi faifaatoaga ae faanoanoa nisi. O e ua faanoanoa o i latou foi ia ua fiu gofie, ua maua i le faamai lea ua tele le meamata a ua le iloa po o fea a ave i ai, ona nofonofo loa lea. Ae i ai nai fai faatoaga sa galulue pea, o lea ua latou selesele. Ae pei o le faafitauli matautia lena o lo o tulai mai i lea atinae o faatoaga, o le leai o se maketi e ave i ai fua o faaeleleaga a le atunuu.

Na taua e nisi sui usufono mamalu, e tau le tele se maketi o le talo i fafo, a o lea foi, e tatau ona vaavaai mo climate resilient crops e tatau ona vaavaai i ai, e pei o le ufi ma le umala. O nai suesuega na fai i Niu Sila ma Ausetalia, e faaletele ni tagata e taumamafa i le talo. Ae toatele atu le atu Asia e fiafia

i le umala ma le ufi. O le a le mea tatou te soona atiae ai fua le talo, pe a fai e limiti le maketi ma le toatele nisi e faaaogaina. A e o lo o tele le maketi o umala, o le tau o le umala la e i ai pe \$30 i le kilo ma le talo e \$2+. Vaai i le eseese o le tau. Ae o le lelei foi o le umala ma le ufi, a oo mai le louloua o le tau i matagi malolosi ma afa, a o la lava e malu puipuia. O nai fautuaga na.

O le galueaina o le umala ma le ufi, e le o se mea e faigofie, aemaise lava le umala. Aua e manaomia le faamalu lelei o le palapala. E talosaga atu ai i lau Afioga i le Minisita o Faatoaga, e manaomia e lou itumalo. Ia tofu le itumalo ma le palau ma se bulldozer e amata ona faatoa ai ia fanua aua foi lea atinae taua. Ae a vave ona aumai tatou miliona ma le \$200 lea ua faaagaga i lenei Tala o le tupe, o le matua tele lava o lea faamamaavega. E matua lagolagoina e lenei itumalo le poloketi ma le faamoemoe lea o le Faigamalo. O lea ua maea ona fai Komiti, o lea foi ua uma ona lesitala ma fai tusitupe. Aua o le faamatalaga lea e aumai, e uma loa ona fai mea na, avatu loa le tou \$200,000 i le tusitupe. A o le fautuaga lena.

O lea foi e i ai le isi faamatalaga na faalogo i ai, e leai se tinoitupe e avatua ia outou. E na ona fai lava o a outou poloketi ae tuu i le Malo le tupe e faasoaso atu ai. O le talosaga a lenei itumalo, aumai lava le \$200,000 a le itumalo. Aumai le miliona a le itumalo, ae make them accountable mo le faaaogaina o tupe na. Ioe, o le osofia foi lena o le fiafia o itumalo taitasi, e faaoga lelei le tai miliona lea o le a avatu, aua atinae o itumalo taitasi.

Ona ou oo mai lea i lau afioga i le Minisita o Galuega, ua faamalo faafetai. Ua tele galuega lelei ua feagai ma lau afioga ma le Matagaluega. O lena ua tuuina atu i lau Afioga le talosaga a lenei itumalo, e famanatu atu ai vaega sa laga i lau lauga faataupou. E i ai lava le manatu maualuga, o lena e i ina le tofa ma le faautaga e faasoaso ai le tamaoaiga o lo tatou atunuu.

E pau lava nai vaega e fia fesoasoani atu a i lau Afioga i le Minisita, e faafetai o lea ua pau maualalo le tau o le eletise, faafetai. Ua matua alalaga si ou nuu ma si ou itumalo i le manaia o le tau o le eletise lea ua i ai, e momoli atu le agaga faafetai. Ae pau lava nai vaega e fia faamalamalama pea, ua ou vaai atu ua tau toatamai lau Afioga i le Minisita, ina ua laga atu le mataupu lea i le tausaga na tea nei. E fai mai foi nisi faamatalaga, e le lagolagoina e le sui usufono o Falelatai ma Samatau le pau o le eletise. E leai, o ai se isi e le talisapaia le pau o le eletise, e oo foi i le tai miliona lea e tufa mai. O ai se itumalo faavalevalea e le fiafia i lena mea. E pau lava le mea lea na faamanatu atu i lau Afioga i le Minisita, leaga sa aumai ia outou folafolaga. E amata i le aso 1 o Novema, ona pau le tau o le eletise i le 20%. Ae a silasila i le tau o le eletise i le aso 1 o Novema, e leai e le i pau. O le ala lena o le matou faamanatu atu, ina ia o gatusa folafolaga ma faatinoga.

Ae faafetai, a silasila i ai, o le aso 11 o Novema lea sa e faatinoina ai le 20% lea. “[.....]”

Tofa Hon Olo Fiti Afoa Vaai: Lau Afioga i le Fofoga Fetalai,

FOFOGA FETALAI: Ia fai mai sau malologa, se i saunoa mai le Afioga i le Minisita.

Tofa Hon Olo Fiti Afoa Vaai: Se i faamalolo foi le Afioga i le sui usufono, ua manaia lava le faalogologo i si ana ote. O le mea muamua lava lau Afioga i le Fofoga Fetalai e fia faasao. E leai se tulaga sa ou ita ai i le tulaga e pei ona saunoa le Afioga i le sui usufono i le paketi o le tausaga na tea nei. O la sa ou fesoasoani atu i le tele o isi mea sa sese mai i lana saunoaga. O le tulaga foi lea ua saunoa ua ou soli le Tulafono. Ia tau mai po o le a le Tulafono ua ou soli i i, i le faapauina o le eletise.

O le tulaga lea ua faapea sa tataua ona amata mai ia Novema, o la ua uma ona silasila i ai le Matagaluega ma le Pulega, ona o le tuai mai o le faaiuga a le Kapeneta na mafua ai ona tuai ona faatino. A o le tulaga lava ia, ou te faamalulu atu i lau Afioga i le sui usufono. Se vaai, o lea lava ua ou nofonofono ma matou nofonofono ma saausi lava ae se i e...ia a outou afioga. A e a e manatu ia te au i le 15 tausaga, e 2 lava au fuaiupu, tulalai atu i i, taofi, taofi. O le mea la lea ua i ai, o le mea lea e tau o le tofa, ua matou matuai nofonofono ma tuu atu le avanoa se i tatala mai outou finagalo, ina ia manino mataupu. O lea la ua outou laki, ae a na ou tago atu nei e fai atu nei. E leai ma se isi o outou e sao se lauga. Ia faamama mai le sausu te i ua ou le oo atu i o i Samatau ma Falelatai. Ma le faaaloalo.

FOFOGA FETALAI: Atonu e aoga foi le tulai mai o le Minisita i le sui usufono mamalu. O uiga lava ia o le tatou Fono tatou te felagolagomai, ina ia agai pea a tatou saunoaga i tulaga mamalu ma tulaga aloaia. Ona o lea ua taua le upu lea o le solitulafono, ae o le va o le aso 1 agai i le aso 11, o se tuuaiga matuaia lea tuuaiga. O le mea lea lau afioga i le sui usufono mamalu, o lena ua e malamalama, ua e silafia, o upu faapea faasolitulafono, e le o se upu taugofie i le faafogafoga a le Maota ma le atunuu. O le mea lea, o lea ua manino lea tulaga ua uma foi ona e saunoa i ai i lau saunoaga i le Fonotaga talu ai, ou te talitonu lava faafetai o lea ua talia le mea ua i ai le eletise, o lea ua pau i lalo. A o faiga faavae a le Faigamalo, e pei foi o Faigamalo talu ai, e i ai taimi e faatalitali ai i faaiuga mamalu a le Kapeneta, faatoa mafai ona faatino.

O le mea lea.... Tulai mai lau Afioga i le Minisita o Galuega.

Susuga Hon Laauli Leuatea Polataivao Fosi (Minisita o Faatoaga ma Faigafaiva): Lau Afioga i le Fofoga Fetalai, e leai se agaga e faalavelave i le saunoaga a le sui usufono mamalu. Sa ou nofonofono foi ma matau ia tu ma aga ae tumu tele i le faaaloalo. Ae ona o le upu lea solitulafono, ou te manatu leaga e mau a tatou faamaumauga. E tataua ona aveese e tuga le upu lea

faapea, ua solitulafono le Minisita i le faatinoga o le mea lea. Ou te talofi o le tulaga lena e tatau ona faamanino.

O le isi tulaga, sa ou matau lelei i le saunoaga a le Minisita i lana lauga foi faataupou. Sa ou matau uma lava i latou nei na tetee i le miliona lenei. Ioe, sa ou matau lelei. A o lea ua fai mai i le tatou Fono lenei, ia faafetai. Ia saunoa ane la ia Papalii Niko ma Fonotoe, e aua le toe o i o i le Good morning Samoa e tetee le poloketi, po o Lealailepule lea. O ia lava lea na tulai ma faapea, e leai se mea e tupu Samoa faapenei. Ia faafetai Lupematasila, ua tafa le tofa, e te talia le poloketi, ia salamo laia. Ma lou agaga faaaloalo.

FOFOGA FETALAI: Faafetai mo le fautuaga. O lea ua aumai le fautuaga mo le upu lea solitulafono. Tulai mai lau Afioga i le Sui Taitai.

Tofa Hon Laufo Fonotoe Nuufesili Pierre Laufo (Anoamaa 2): O lea foi sa nofonofo foi lenei itu ona e manatu i le taimi o faagasolo le tatou Fonotaga, ia aua ne i tele ni faauilavea. Ae ona o le faasaoga i le saunoaga a le Minisita, a toe faafofoga lelei lava i polokalame ia sa taua o le Good morning Samoa. E leai lava ma se upu faapea, tetee i le polokalame lea e taua ai le miliona, e pau lava le mea sa fai, sa fesiligia lea vaega ma lea vaega, aemaise lava le faatinoga. Ae leai ma se upu ua faapea atu, e matou te le talia i totonu o matou itumalo. O la toeitiiti uma ona lesitala la matou Komiti. E leai lava ma se mea, o la lava e sosolo i luga o Faiga Faavae la ua aumai e le Matagaluega. O le matou lea naunau atu i le tulaga lea, ae masalo o le saunoaga a le afioga i le tootoo o lo o saunoa, atonu se i tulai mai e faamanino po o le a le uiga o le solitulafono. E masalo o le le tusa ai ma le Tulafono lea a le Regulator, e pei lava o le mea lena o lea e tau agai i ai le sui usufono. Ona o lea ou te faalogo atu, e le i oo i ai, o le mea la lea, oo i ai.

FOFOGA FETALAI: E faamalulu atu i le sui usufono mamalu, o lea ua aumai le fautuaga i le upu lea, leaga o le upu o lea ua taua i totonu o faamaumauga a lo tatou Palemene. O le mea lea ua i ai le manatu o le Nofoa ua tatau ona aveese le upu lea solitulafono. A e faalaulelei mai e lau afioga i le sui usufono mamalu, pe a fai o se isi faaupuga e ono faigofie ma taugofie. Ae o lea o le a aveese le upu lea, solitulafono ma saunoaga.

Tulai mai lau Afioga Tapunuu.

[Upu na faatonuina e le Fofoga Fetalai e aveese mai faamaumauga o le saunoaga a le sui usufono mo Falelatai ma Samatau: “*E ui lava ina solitulafono lau Afioga i le Minisita, i le faatinoina foi o lea pau maualalo, a o le agaga faafetai, o le pau. Ae tuaia le solitulafono e faitalia ai lau Afioga i le Minisita.*”]

Afioga Hon Tapunuu Niko Lee Hang (Vaimauga 3): Lau Afioga i le Fofoga Fetalai, e leaga o lea ua afea e le Minisita o Faatoaga lou igoa i le miliona lea e tautau. E tutusa uma lava matou i le miliona lea e faapea ua matou tetee. E pei ona saunoa foi le sui usufono o Falelatai ma Samatau. E leai se sui usufono faavalevelea na te tetee lenei manuia e manuia ai itumalo. A o le talia o le miliona, oh e 105%. O lea lau afioga, o lou uso foi i le tofa i le matua, ua leva ona faasalalau o au le isi tagata tetee i luga o le social media. E oo foi i le good morning Samoa, e leai ma se taimi na fai ai sau tala i lenei mea. Atonu na i ai nisi na talanoa ai, ae ou te le i talanoa faatasi i ai. Ou te talia, 105%, ou te le tetee. Ua fai fai la lua misa ma Samatau ma Falelatai, ae o lea ua tau agai mai ia matou. E pei ua lavea fua ae le i fai misa. Ma lou faaloalo.

Susuga Hon Laauli Leuatea Polataivao Fosi: O le a le faia se faafinauga lau Afioga, o le a taatia ia faapea. O le mea sili lau Afioga i le Fofoga Fetalai, o lea ua tautino le solo. Ia aua laia le toe faia. Ia omai laia e fai faatasi le tatou mataupu.

FOFOGA FETALAI: Tulai mai lau Afioga Faleata 3.

Tofa Lealailepule Rimoni Aiafi (Faleata 3): Lau Afioga i le Fofoga Fetalai, o le taimi ua ou foi mai o sa ou aoga ma o loa ma le Minisita e tatala le fale muamua lava o Tina pulenuu i ina i Salelologa i luga o le uafu. Lauga le toeaina, e ese le atamai, o le maota lenei o le maota o pulenuu. Uma loa lea ua complain nai tina ou faalogo atu o talanoa fai mai, lau Afioga i le Minisita, na e saunoa mai nei lava o le Maota o le Maota o tina, a o lea ua e lauga o le maota o pulenuu. Fai mai le toeaina, o ai na fai atu ia outou o le Maota o Pulenuu o le Maota o tina, a ua uma ona tau i fafo o le Maota o Pulenuu.

Lau Afioga i le Minisita, ou te le o malamalama po o le a le \$1 miliona lea e talanoa ai le vaega lea, o le \$200,000 lea tatou te talanoa ai. E tupu loa le \$1 miliona, ou lagolagoa loa. But for now, I'm okay I'm just...

FOFOGA FETALAI: Ia, sa ou manatu lava o lea ua maua le finagalo o le sui usufono mamalu. Ae talu ai o lea e faagasolo pea le lauga a le sui usufono mamalu mai Falelatai ma Samatau ia, tatou malilie ia tatou tuu ia le avanoa i le sui usufono mamalu e faaauau lau saunoaga.

Afioga LUPEMATASILA GALUMALEMANA TOLOGATA TOGIA TILE LEIA: Faafetai i lau Afioga i le Fofoga Fetalai. Ia e faamalulu atu foi i le Afioga i le Minisita o Galuega faapea foi le Minisita o Faatoaga pe afai e paopapa foi se faamatalaga ua tuuina atu, a o le agaga moni lava lea e taumafai e fai atu, ia o le a ou taumafai e faamatala atu. Afai

e le talia le solitulafono, ia pe manaia se faaupuga o se faiga fai e le tusa ai ma le Tulafono. Ae mo le silafia, ua uma ona faatulaga e le Malo ma le Ofisa lea o le Pule Faatonu, na ala ona faatu e le faigamalo a le HRPP le Ofisa lea o le Pule Faatonu, ina ia tutoatasi le fetuunaiga po o le iloiloia o le tau faatatau o le eletise. I lalo foi la o le Tulafono lena, e 20 aso e faasalalau ai e le faalapotopotoga so o se tau fou o le eletise faatoa mafai ona effective. A maua mai la e lau Afioga i le Fofoga Fetalai le faamalamalama lea sa avatu, ua uma ona faaalu le tau fou i le aso 1 o Novema, ae oo atu i le 11, fai ai lava i ina le faaiuga ae back date i le aso 10. Ae sa tataua ona faasalalau mo le 20 aso. Ae pei lava ona ou fai atu, e i ai mea o faiga foi ia e le tusa ai ma le Tulafono, a o la e penefiti ai le atunuu. O le mea lea sa ou fai atu ai analeila, ia faafetai. E ui lava ina le tusa ai ma le Tulafono o lo o i ai, ae faafetai o la e manuia ai le mamalu o le atunuu. Ia ma le isi lava vaega taua o le Pule Faatonu, leaga o lea sa i ai le faamatalaga faapea o le taimi sa ou Pule Sili ai o le Faalapotopotoga e na o le sailiga lava o le polofiti le mea sa ou faia. E le sao foi lena tuuaiga, aua o le aoga tonu lava lea na ala ai ona fai le Pule Faatonu, e fai o le tilotilo i le faalapotopotoga a o le tilotilo foi i le mamalu o le atunuu, consumers, ina ia seti lelei le tau talafeagai, e manuia consumers, ae manuia foi le faalapotopotoga ia aua ne i gau. E pei o nai vala na e faamalamalama atu pea le uiga o lau faamatalaga, e le o tusa ai ma le Tulafono. Ma o le isi mea matagofie i le faiga o le Ofisa lea o le Pule Faatonu, ia aua ne i faaogaseseina e se faigamalo e tulai mai i lea taimi ma lea taimi le tau o le eletise ma le tau o le suavai e fai ai se faatosina. Ia o lea na ou matau ma le totoia i saunoaga faa-taupou a sui usufono uma e toafa o le la itu, a matau i ai, e leai ma se isi e le i faafetai mai i le Minisita i le faiga o auala ma le faiga o latou paipa. Ia o lona uiga la na toso latou paipa ma fai latou auala ae le i omai i le Palemene. Ia se i vaai la i le matautia o le mea lea? A o nai vaega ia e taua ai le Tulafono, e limataitaiina ai le faatinoga o tatou galuega.

FOFOGA FETALAI: Ia, ou te fautuaina le sui usufono mamalu... Oi, ia tulai mai lau Afioga i le Minisita pe a e fesoasoani mai i i.

Tofa Hon Olo Fiti Afoa Vaai: Lau Afioga i le Fofoga Fetalai, na o si mea lava lea e fia faasao i le tulaga lea ua saunoa i ai i le Tulafono lea i le Pule Faatonu. E manatua foi o lea e galulue le Pulega i le tulaga o fesuisuiaiga o le tau o le eletise pe a i ai le tulaga foi lea o le siitia o le suauu pe toe tuu mai foi la i lalo le tau. E muamua lava ave i ai le fautuaga a le Pulega i le Pule Faatonu, e le pule mai le Pule Faatonu i le tau o le eletise. E ave i ai le fautuaga a le Pulega. Ou te ofo sole i le leva ona pule i o. Ona aumai lea o le fautuaga a le Pule Faatonu. Ua uma uma lava mea na. Ou te le iloa la po o le a le isi tulaga o sese i ina i le vaega lena.

O le tulaga ia o... ia atonu ou te oo atu i ai pe a ou talanoa atu i le faiga o auala. Ou te le tilotilo i se tulaga foi lele vagana ua e oo mai i i ona faatoa fai lea o lou auala. E leai, leaga e le o ni auala a ni sui usufono o le Palemene o auala a le atunuu. E faapena la ona faasolosolo i ai le matou vaai. Ia, o le tele ia o nai nuu ua talu lava ona po o fea ea le tausaga, 1962 ea a Laauli, talu ona tutoatasi Samoa, e le i oo i ai se auala. Masalo po ua 7 nei auala ua uma ona faatino. O lau la lona vaai. Ou te le popole i ai pe saunoa mai sui usufono e fai le auala pe a, leai o lea ua ou savali lava. Ma e toetiiti lava ou oo atu i lou itumalo. Na uma loa ona ou... tusa na gata mai lau asiasiga i Manono, a o lea ou te oo atu loa ae tetee mai loa foi.

Ia, o le tulaga lava ia o tatou auala, mea sili lava lea o le a ou talanoa atu i auala, o le faasologa lava ia e alu atu lava i le tulaga pei ona avatu, e ave lava le faamuamua i vaega o lo o papaaao ai le mamalu o le atunuu, e le toe i ai se tulaga e... e faamulimuli... o priorities lea ua ou alu atu ai. Pe tou te saunoa mai ma tatalo mai i auala foi lea auala galue, ia outou malilie, e mulimuli lava tama na. A o le tulaga lea e faasolo atu ai le tatou galuega, ia o nai nuu foi lea e le i faalogo lava o oo ai se masini e sua se auala e feafioai ai. O le tulaga lona. Ae tetee loa la le sui usufono pe tetee nuu, ia o lou taamiloga lava lona po o le isi 20 tausaga faatoa oo i ai se faaleleiga o se auala po o se vai foi. Ae se i oo i le taimi ou te tali atu ai ona outou faafofoga lea i le tulaga ua i ai le tatou galuega. Ma le faaaloalo lava.

FOFOGA FETALAI: Ia, ou te iloa o lea ua tele le fesoasoani a le Afioga i le Minisita i le sui usufono mamalu. Ia ma e ao foi ona fautua atu le Nofoa, o lo o manino i tatou Tulafono Tumau, e le talia le faauigalua o ni saunoaga. O lo o manino lava le tulaga o lea ua faatusatusa saunoaga a nisi sui usufono ma lou lagona. O le taua foi o le Pule Faatonu, o lea ua saunoa manino le Afioga i le Minisita, ma o le Malo foi e ona le tali, e le mafai ona toe taua.

O le mea lea, see ese le sui usufono mamalu mai le Pule Faatonu ma e agai i le eletise, ae tele foi lava nai mea ia e matau atu le Nofoa, o lea lava e toe contradict lava e oe au saunoaga i le tulaga o le le agai i le Tulafono.

O le mea lea o le fautuaga i le sui usufono mamalu, ia, see ese i se isi mataupu o lea ua maua ma o lea foi ua tali manino le Afioga i le Minisita. O lona. Ma le agaga faaaloalo.

Afioga LUPEMATASILA GALUMALEMANA TOLOGATA TOGIA TILE LEIA: Faafetai i lau Afioga i le Fofoga Fetalai. Ia o le a ou see ese mai le vaega lea. E leai se agaga e faataumatatao i le Afioga i le Minisita, ae aoga mataupu e tau lagalaga e manino ai foi ma maua ai faamatalaga sao o mataupu e pei na talanoaina.

Ia, o le a taatia le tele o talosaga o lona ua i ina i lau Afioga i le Minisita. O se taimi foi maua se feiloaiga, faamalamalama atili nisi o talosaga a lenei itumalo, ma nai tuualalo ua uma ona tuuina atu.

Ona ou see ane lea i le Minisita o Faalapotopotoga Tumaoti. Ia, o le...

FOFOGA FETALAI: Toe lua minute o le sui usufono.

Afioga LUPEMATASILA GALUMALEMANA TOLOGATA TOGIA TILE LEIA: Ua fao uma e le vaega lea e faauilavea lou taimi. Ae atonu e...

Tofa Hon Leatinuu Wayne Soialo (Minisita mo Pisinisi, Alamanuia ma Leipa): Lau Afioga i le Fofoga Fetalai, ou te faatu atu se lafo, *E toe faaopopo se isi 15 minute o le sui usufono, o lea ua oo tonu lava i lou taimi, ou te fia faalogo foi i ai po o se a se maemaea o i ai ina ia mafai ona tali atu ai.*

Ma le faaaloalo lava faafetai.

Faaluaaina e le Sui Taitai o le Itu Agai.

FOFOGA FETALAI: Ia pe faalua lava pe a, e fai atu lava i luga i i le faaiuga.

O le mea lea, faaauau lau saunoaga toe lua ou minute.

E le i tuuina atu le maliiega a le Maota i le lafo.

Afioga LUPEMATASILA GALUMALEMANA TOLOGATA TOGIA TILE LEIA: Ia, faafetai i lou uso a Minisita. Atonu o se taimi saunoa atu nisi e uiga i le vaalele, ae lagolagoina e lenei itumalo, aumai le tatou vaalele.

O le isi vaega o le daylight saving. Tasi lea vaega taua. Sa ou faapea lava au sa fai le tatou tala i lena fonotaga talu ai, ai a faataatia atu... sa ou faapea na saunoa mai le Afioga i le Minisita, ia taatia mai o lea se i fai i ai se iloiloga ma se suesuega. Ae ua ta te i e pei lava o le aso na sosoo ai na taofi ai le daylight saving, a o le tele ia o le galuega a le Malo sa fai foi i lena Tulafono. Ma sa i ai foi le manatu sa tataua ona aumai iinei i le tatou Fono a le Palemene e faasolomuli ai i tua pe afai ina ua maea lena ona fai se iloiloga iliili pe sao le faigamalo fou o tulai mai nei e leai se penefiti o lena foi daylight saving. Ae mo le silafia, ae le i sifia le international dateline foi lele mai o i Falealupo i le itu le la i le matamatagi, sa tautaua Samoa o le atunuu e mulimuli vaai i le goto o le la. Ae ina ua sifi i o i le itulagi lea, na tumau pea le tautaua o Samoa, o Samoa o le atunuu e muamua vaai i le oso ae o le la. A o lea la ua fesui nei, ia e le o toe muamua vaai tatou i le la, pei lava ua ese le atunuu la ua muamua vaai i le la, a o le tele foi ia o penefiti o le daylight saving. Ae sa ta manatu lava se i faagasolo lenei tausaga ma fai se iloiloga, ia afai e

mautinoa e leai se aoga, ia ona tuu lea a o la e ua fai i le auala o mea. Ia tasi foi lene faiga e fai e le tusa ai ma le Tulafono.

FOFOGA FETALAI: Ia tulai mai loa lau Afioga i le Minisita leaga o lea ua taua le daylight saving e faapitoa i lau Afioga i le Minisita.

Tofa Hon Leatinuu Wayne Soialo: Ia lau Afioga, ia e sili loa la pe a faasao i le taimi lenei. Lau Afioga, sa nofonofo lava ma faatalitali po o fea e agai i ai. Ae talitonu tasi la lea tagata e le o malamalama i le Tulafono o le Daylight Saving. Mo le silafia e le sui usufono, so o se taimi e oo ai i le daylight saving, e tataua ona aumai i ai le saina a le Ao o le Malo e faatino ai le daylight saving. E tasi lava le tausaga na faatino ai, na o le taimi na amata ai, ae o taimi uma lava e sui ai le taimi, e le i i ai ma se faamaoniaga a Le Ao o le Malo i le suiga o le taimi. Ua leva la ona solitulafono le faiga o le Tulafono lea. Ae sa faapea se i tali atu i ai i le taimi e tali atu ai, ae ne i te i ua tuulua faapea ona alu sese ai lava lea o le tatou mataupu. Ae o le faamalamalama lenei lau Afioga i le Fofoga Fetalai, ua leva ona solitulafono i le suiga o le taimi. O lea la ua saina nei Le Ao o le Malo ia aua ne i toe suia le taimi ae ia faatumau ai pea i le taimi lenei. Ia ma le faaaloalo lava lau Afioga. Faafetai mo le avanoa.

FOFOGA FETALAI: Ia, ou te iloa o lea ua manino le sui usufono mamalu. Ou te talitonu foi o lea sa tatou talanoaina foi i le tatou Fono talu ai. O le mea lea, o lea ua maea lou taimi, ae faaiu maia lau saunoaga, tuu atu pea le avanoa e faaiu maia lau saunoaga e alofa atu i lau tapenaga.

Afioga LUPEMATASILA GALUMALEMANA TOLOGATA TOGIA TILE LEIA: Faafetai i lau Afioga i le Fofoga Fetalai. E leai foi se manatu e toe faataumatatao i le Afioga i le Minisita, a o lenei ua avatu se tuualalo ma se lagona vaivai o lenei foi itumalo. O le tele ia o nai mea ia ae peitai ua faoa uma lou taimi e le au faauilavea lea na tulai mai.

Ae faamuli atu ia se faamatalaga i le Minisita o Leoleo ma Faiga Palota. I le tulaga ua tulai mai i mea o fualaau faasaina, o lea ua oo i luga i tagata faigaluega mauualuluga o le Malo o aafia i le solitulafono lenei. A o le fesili lava o lea ou te nofonofo ma fesili ai, o fualaau faasaina e le o ni mea e. O lona uiga na o tagata taualoa ma tagata maumea o lea e faaaogaina fualaau nei. E pei o le tasi lenei aoga o le scanner lea e tulituli atu ina ia mafai ona maua ai vaega ia. Ma o lea ou te manatua a o aveia au ma Pule Sili o le Faalapotopotoga o le EPC, sa ou amatamea i le taulagalaga i le Malo ua tataua ona fai se Tulafono a le Malo e test uma ai le aufaigaluega a le Malo, amata mai lava i luga i le Kapeneta faasolo mai ai i Ofisa Sili o Pulega, test uma le aufaigaluega a le Malo. Aua o lea lava e i ai le masalomiaga i le tulaga lea e i ai o le tele o faalavelave. E oo foi i le Faalapotopotoga o le EPC i lenei foi

vaitau, o le tele ia o faalavelave e tulai mai. Ae a fai se Tulafono amatamea tatou, test uma tatou. O tatou o le faauluuluga o le atunuu, e vaavaai mai uma le atunuu ia tatou. Ae pei o le isi lena faatupu manatu. O le lelei o le Tulafono, ona na o le tasi lava si mafuaaga na tau tuai ai ona vaavaai i le mea lea, o le aiatatau a le tagata. Ae fai foi o le aiatatau a le tagata, ae tatau foi ona silasila totoa i le aafiaga o le atunuu i le solitulafono lenei. Ia e tasi lena mea na o le faamatogi atu faapena, ae taua le silasila totoa i ai o le faigamalo o tulai mai nei.

O le isi vaega e fia oo i ai se tala, sa ou taua i lau lauga faataupou amendments foi nei po o le suiga o Tulafono o Faiga Palota, lea sa avatu ai le tuualalo e faasee ese faifeau mai le process lea e saina i pepa nei e faamaonia o faiga palota. O le a le mea lea ua tupu nei i le tatou faiga palota laitiiti lea na faatoa uma atu nei, ua vaaia ma le faanoanoa, ua le amanaia e le Faamasinoga le molimau a le faifeau, ae tasi lea molimau taua tele. O lea tatou te faaaogaina faifeau e saina i pepa taualoa a le Malo.

FOFOGA FETALAI: Ia, tulai mai lau Afioga i le Minisita o Faiga Palota o lea ua taua lou...

Afioga Hon Faualo Harry Jeffery Schuster (Minisita mo Faiga Palota): Lau Afioga i le Fofoga Fetalai, e ui e le o au o le Minisita o Faamasinoga, ae i ai foi le Tulafono foi lea i le amanaia i le va o le Palemene ma le Faamasinoga, e aua le feaiaai i le tulaga faapea. O le faaiuga a le Faamasinoga lea na fai, na faavae i luga o mau anoa na faafofoga i ai le Faamasinoga. Po o le a la le tatou le fiafia faapea ua le talia le upu a le faifeau, ia o le faifeau foi e le o le Atua pei na ona tuu faapena. Ae ana faapea mai a faapea o le faifeau e tatau i le Faamasinoga ona talia le mau, e le sao la le tulaga lena i tulaga tau Faamasinoga ma Tulafono tau Faamasinoga. E faasao atu le mataupu lena.

FOFOGA FETALAI: Masalo ua malamalama mai le sui usufono, o lea ua sao ua saunoa manino lava le Afioga i le Minisita, aua tatou te tuuaia le Faamasinoga ua le talia le molimau a le faifeau. E leai, e faalagolago le Faamasinoga i mau anoa mo le silafia e le sui usufono mamalu. Ia ma faaii mai loa lau saunoaga ua uma lou taimi.

Afioga LUPEMATASILA GALUMALEMANA TOLOGATA TOGIA TILE LEIA: Faafetai i lau Afioga i le Minisita mo le tali malamalama. E leai ou te le o fesiligia le Faamasinoga ma le galuega faa-Faamasinoga. O le mea lea e avatu ai le tuualalo, leaga o lea ua tatou tuua faifeau i totonu o le process o tatou palota. Ae ana le tuua e tatou le faifeau i totonu o le Tulafono, e le aafia fua le faifeau i o i le Faamasinoga.

E pei o se tuualalo lena lea na avatu. Ia, ae o nai motugaafa lava e avatu, afai foi e paopapa...

FOFOGA FETALAI: Ia, se i tulai mai Afioga i le Minisita o Faatoaga. E faamalie atu i le sui usufono.

Susuga Hon Laauli Leuatea Polataivao Fosi: O se mea lava e fia faamalamalama lau Afioga i le Fofoga Fetalai. Ioe, o le fesili la i le sui usufono mamalu, o ai na tuua faifeau i totonu o le Tulafono? O le fesili lena aua o lea e taumafai atu nei e toe teuteu le Tulafono ona ia aua ne i afaina tulaga ia e saunoa i ai le sui usufono. A o le fesili lena po o ai na tuua faifeau i totonu o le teuteuga o le Tulafono? Fesili ifo ia...

FOFOGA FETALAI: Ia, ou te manatu o lea ua saausi foi le saunoaga a le sui usufono mamalu. Ou te talitonu foi, ne i avea foi lo tatou naunau i le i'a ae masaesae ai le upega. O le fautuaga lava ia a le Nofoa, o lea ua taua suafa o faifeau ma tatou mafaufau foi i se isi itu. O le mea lea le sui usufono mamalu, ia ua...

Afioga LUPEMATASILA GALUMALEMANA TOLOGATA TOGIA TILE LEIA: Faafetai. O lea o le a faauma atu. E faauma atu i le... a o i ai pea i i le Minisita o Faiga Palota...

FOFOGA FETALAI: Ia se i tulai mai lau Afioga i le Palemia.

Afioga Hon Fiamé Naomi Mataafa: Lau Afioga i le Fofoga Fetalai, e matauina pei e le ano mai le sui usufono i le Nofoa i le tuu atu o le faatonuga e faauma mai lana saunoaga. E lelei lava le tatou amanaia o le Nofoa. O se tuualalo lea mo sui usufono o le Palemene.

FOFOGA FETALAI: Masalo lau Afioga i le sui usufono mamalu, se o lou alofa atu lava a ua tatau ona fai se faaiuga, ae faauma mai loa lau saunoaga. Aua ne i toe sili atu i se isi... faauma mai loa lau saunoaga.

Afioga LUPEMATASILA GALUMALEMANA TOLOGATA TOGIA TILE LEIA: Faafetai. Ia o lea o le a faauma moi atu le lauga a lenei foi itumalo. Ia na pau lava si mea lea na tau avatu i le Afioga i le Minisita faauma ai loa, sa ta look forward lava e usu le tatou Fono lenei ua i ai ma sui tamaitai foi ia e toalua lea ua faasolomuli i tua, ae ui i lea, sa ta faapea...

FOFOGA FETALAI: O le a tele lava le sese o le sui usufono mamalu. O sui usufono tamaitai o le faaiuga a le Fofoga Fetalai. E le o se faaiuga a le Minisita. O le mea lea, ua maea le taimi o le sui usufono mamalu.

Afioga LUPEMATASILA GALUMALEMANA TOLOGATA TOGIA TILE LEIA: Ia o lea la ua uma lelei atu. E momoli atu le faafetai tele i lau Afioga i le Fofoga Fetalai mo le avanoa o lenei foi itumalo. E avatu foi malu i puega, e le gata i lau Afioga i le Fofoga Fetalai, ae faapena foi le la itu o le Maota i le Afioga i le Tamaitai Palemia ma le paia maualuga o le Kapeneta. O le a foi sa outou faafofoga ua le tautamalii pe paopapa. Ia e i ai lava le manatu e vaatele i ina ma le manatu maualuga, ia e le tatau ona motu i tua se manatu, o manatu lava e tatau ona avatu e faufausia ai lo tatou sa i lenei foi Paeaiga.

Ia agalelei le Atua i lau Afioga i le Fofoga Fetalai, maua lau tofa maua lou malosi i le tino aua le feagai ai ma le faafoeina o le sa o le tatou atunuu. Ia faapea foi le Afioga i le Tamaitai Palemia ma le paia o le Kapeneta, maua la outou tofa aua le feagai ai ma tiute ma tofiga faigata. Ia alofagia foi le Atua lenei Itu o le malu i le apulu o tofaga i le Afioga i le Taitai. Ia alofagia e le Atua e vave se aso e toe faafoi atoatoa ai lona malosi ia tatou feiloai i se aso o i luma. Ia faapea foi lenei itu o le malu susuga i sui usufono, maua so matou malosi e auauna ai i lo tatou atunuu. Faafetai mo le avanoa. Manuia le afiafi.

FOFOGA FETALAI: Malo saunoa. Faafetai o lea ua maea mai le saunoaga a le sui usufono mamalu, ma o lea foi ua faailoa mai ona atugaluga aemaise lava o le naunautaiga o le itumalo aua le galuega faatino a le Palemia ma le Kapeneta, ae faafetai. E aoga foi le faatulai mai e le Afioga i le Palemia o le amanaia o le tatou Nofoa ina ia faapena ona tatou galulue faatasi. O tatou foi ia ua uma ona fai a tatou lauga faa-taupou, ia sa tele lava le taimi muamua. O le taimi lenei, e limiti a tatou saunoaga, e i ai i totonu ma faauilavea i le 30 minute, ae o le manatu atu lava ma le alofa atu lea e tuu avanoa atu ai, ae tatou galulue faatasi. A outou silasila mai i sui usufono matutua ua maea ona sausaunoa, o lo o o lava i tulaga mamalu ma tulaga masani aua le tatou galuega tatou te felagolagomai. A o outou lava o sui usufono mamalu e lafo atu i ai le faamoemoe o le Nofoa, tatou galulue faatasi e manuia ai le tatou galuega.

O le mea lea, tulai mai se isi sui usufono mo le tatou galuega. Ia, o lea ua ou matau atu pei o lea o le a fou mai le sa o le Vaa o Fonoti. Ia, o le avanoa lea o le sui usufono mamalu.

Tofa MAUU SIAOSI PUEPUEMAI (Vaa o Fonoti): Lau Afioga i le Fofoga Fetalai, lau Afioga foi i le Fofoga o le Fono, e tulai atu i le ava ma le

faaloalo e fia faalia se lagona ma se motugamanatu aua foi le faamoemoe o le Palemene.

Ou te manatu o lea ua tuanai le tauasuasua o lenei aso, o lea foi ua fotupule le Tagaloamatua, aua foi faiva o le Palemene. Ae le i see la le sa o lenei sui usufono, ou te muai alofa ma faatalofa atu i le paia maualuga o le Fonousu a le atunuu i le afio o lau Afioga i le Tamaitai Palemia lau Afioga i le Sao Faapito ae faapea foi lau Afioga i le Sui Palemia lau Afioga i le Saoalii. E ofo alofa atu foi ma faatalofa atu i le paia maualuga o le Aiga Kapeneta i a outou Afioga i Minisita ae faapea foi a outou Minisita Lagolago.

E faatalofa foi ma ofo alofa atu i le Afioga i le Sui Taitai, o lea foi ua tatou le faatasi ma le Taitai o le Vaega Faaupufai ona o nisi foi o mafuaaga ua silafia e le Maota, ia ae ofo alofa atu ma faatalofa atu. E faapea foi sui usufono mamalu uma, sui usufono filifilia o itumalo taitasi ua tatou potou aua le Fonousu a o le fonou tau amata foi a le Palemene o Samoa.

E ofo foi ma faatalofa atu i le paia maualuga o Ofisa Sili o Pulega o Matagaluega a le Malo aemaise foi o pisinisi ma tulaga tumaoti. Ia, e faapea foi le faatalofa i le Failautusi, le Sui Failautusi o le Fono aemaie foi le au galulue aua le fonotaga a le Palemene i lea vaitau i lea taimi.

Ou te faapea atu ai foi, ia, o paia o Samoa, e manatu o le a taoto ia faalaau ponapona o le tausoga, ou te talitonu o lea ua maea ona fola, fola lelei ma uma foi ona paepaeiuga. O mamalu ia e le toe oo i ai sa matou talanoa, ae faapea foi si ou itumalo o Vaa o Fonoti. E talitonu o lo o tu maualuga foi le agalelei o le Atua mai lava i ona tupu ma ona ee seia oo lava i le lavalaoa o le tatou itumalo.

E faapea foi le paia i le afaigaluega o suli ma feoi o le laau gafavaa aua le galuega folafola a le Atua o lo o faapena ona fitaituga i le tatou itumalo. Ou te faapea atu ai, ia manuia le tausaga fou i lo outou mamalu. E talitonu o lea ua tatou i ai foi i galuega tauamata a le Palemene. O lea e faamanuia atu ai le tausaga fou i le aoao o Samoa.

Lau Afioga i le Fofoga Fetalai, ou te tulai atu ma le agaga faaloalo, o lea foi ua e faalalanu tulaga ia, pei foi ona i ai lena tausaga ua tuanai i a matou lauga faataupou. Ou te manatu foi e le toe oo foi i ai se lauga a le vaa e tasi o Samoa. Ae o le a taumafai foi e tuli ala pupuu, talu ai ona o le taimi e utiuti. Ona faapea lea, o le a ou amata mai i le Minisita o le Siosiomga.

E talitonu o lea ua i ai nisi o fuafuaga alualumamao a le Matagaluega aua lava le puipuia o le gataifale o le tatou atunuu. Ia, e avatu le faamalo i lau Afioga i le Minisita faapea foi le Ofisa Sili o Pulega aemaise le Matagaluega, e le faigofie, leaga o le isi lea Matagaluega e matua taua tele i le tatou atunuu. Ia na ona faamanatu lava o la e faafogafoga mai si ou itumalo. Ia tele nisi o aiga, o le upu moni a oo ina fai a latou taumafataga, ia ae a oo ina sua tutui le tai, ia ua faateia ua osofaia i latou i nai suasami. O le mea lea lau Afioga i le Minisita e le mafai ona natia o la e faafogafoga mai lou itumalo. O lea lava ou te agai i tua o le latou lava lea tala. Mauu faaleo pea i le Fonousu a

le atunuu, pe fai ae o le a foi le taimi e fai ai, a o lea lava matou te faalogologo atu. Ia e momoli atu pea le tuualalo, talitonu foi o lea sa ou oo atu i lou ofisa toe momoli atu le isi tusi, ou oo atu ma le pizza fai le ta faasoa. Lau Afioga i le Minisita e talitonu o le a talia foi i lou alofa ma lou agalelei i si nei foi itumalo.

O le itumalo foi lenei o Fagaloa o lena ua e silafia lelei, lea foi sa e galue i le Matagaluega lea sa e taamilomilo. O le tele foi o taimi sa e talanoa mai ma e faasoa mai, na o tagata totoa aua foi e onosai le oona o le suasami peitai o lea ua e tulai mai, ia lau faaloalo lea faafetai tele.

Ona ou see mai lea i le Minisita o Aoga, ia e le tau selu atu. E talitonu foi o lau Afioga o lea foi sa feagai ma le galuega faafiaoga. Ia ua e silafia foi le tulaga i le manaomia tele o faiaoga. O le itumalo lea o Fagaloa e pei foi ona ou talanoa atu ua maea tapena tulaga i faleaoga. Ua matuai lelei lava, muliga foi le maota o le Palemene i faleaoga o lou itumalo. O lo o o ai foi faiaoga ae o le mea o lo o tulai mai, e i ai le isi aoga e na o le toalu faiaoga. E i ai foi isi aoga e toe 108 tamaiti ae toatolu faiaoga. Na soo atoa lava le prize giving a aoga tulagalua e 4 o lou itumalo o ou auai. Ae o le naunautaiga lea sa ou taumafai i ai, leaga sa ou aoga foi i Fagaloa ae leai se kesi, sa ou faamatala foi i tamaiti tulaga ia. O le fala ae pei e te faapio faapea, ioe, na tusi lea o le peni. Ae o lea la ua molimauina i lenei vaitau, ua leai se toe faapio ae ua tusi sao lava i luga o a latou kesi ma nofoa ua lelei tapena. Ae pei o nai vaega ia lau afioga i le Minisita o Aoga, se i e silasila ane lava ma lou alofa. Manatu foi pe a avanoa se aso o lenei vaiaso, ou te asiasi atu foi ma se ta pizza ma fai foi se ta tala i tulaga foi o aoga a lo matou itumalo.

Ona ou see mai lea i le Minisita o Leoleo. O upu a e masani ai a malu lava i le faletele e malu foi fale laiti. O le uiga o le talanoa, o se tasi lenei o Matagaluega e pito sili ona taua tele i totonu o lo tatou atunuu. Aua foi a malu le Matagaluega i le faatinoina o la latou galuega, e talitonu o le a faapena ona saogalemu Samoa. O le itumalo lea o Fagaloa, e uma loa le TV, e matamata loa i le tumutumu o le mauga tulou. O lona uiga o le tele o lo latou taimi o la e matamata ma molimau mai i a outou saunoaga i polokalame i lea TV ma polokalame i lea TV. O lea latou te maua ai faaaliga i tulaga e pei ona faaaliga. Le fualaa lea o le maluaga ma le aisa aemaise o tulaga i laau malosi. E toatolu loomatutua ma le toeaina e toatasi o lou itumalo, na faasoa mai ia te au. Mauu faaleo i le Palemene, o le a se faiga? Ua lagona le popole, mafua i se a? Faitau latou i aso ua tuanai, o latou soifua ua faitau i le 90, 91, 92, 93. A o lenei vaitau ua tele le suiga i la latou faalogo ma le vaai. O le mea lea lau afioga i le Minisita o Leoleo, faapea foi le Ofisa Sili o Pulega ma le Matagaluega e le faigofie o outou faiva. O outou faiva foi ia, o faiva lava e lamatia, mafua i se a? Leaga o outou faiva o outou e malu ai le atunuu. O le saogalemu o Samoa ma ona tagata, o lea e i o outou aao. E avatu le faamalo, avatu le faamalo mai tausaga ua tuanai a e le i ulufale mai le maota. Ou te fiafia lava e ave lau faamalo i le toatele o Leoleo Sinia. Malo

i la outou galuega, e le pei o nisi o nai malu o le malo ua afaina lava, ona o lo outou naunautaiga ina ia saogalemu lo tatou atunuu. E talitonu foi e le o muta foi le galulue faatasi o lau afioga ma le Matagaluega, ia na o na avatu pea o le tuualalo ina ia siitia pea le auaunga faaleoleo, ina ia maua se Samoa saogalemu. A o galuega uma o lo o faatinoina o lo o maitauina foi, o lea foi sa molimauiina foi i vaitaimi o aso fiafia. E i ai le manatu o lea foi maua tala i Savaii faapena foi Upolu, e laititi lava nai faalavelave laiti, ae o le tele lava o le Kerisimasi ma le Tausaga fou, o lea lava sa sologa lelei mea uma. Ia ae mafua mai, ona o le galuega a le Matagaluega. O le mea lea e avatu ai le faamalo i lau afioga i le Minisita, aemaise foi le Ofisa Sili o Pulega ma le Matagaluega.

Ia ona ou see mai lea i le Minisita o le Soifua Maloloina. O lea foi na maua ua foi mai lau asiasiga i si ou itumalo, ia ua uma foi ona ta fetuunai. Ia e leai lava sou masalosalo, pau lava le mea lea ou te faia o le tatalo i le ao tatalo i le po. O se taimi ona to mai lea o lou agalelei e faatino ai foi se manaoga mo se falemai o lenei itumalo. Pei ona outou silafia sa ou lauga ai foi i lena tausaga ua tuanai, faailo uma tulaga uma ia ma mafuaaga.

Ae faaleo foi le agaga faafetai i lau afioga i le Minisita faapea le Ofisa Sili o Pulega ma le Matagaluega o le Soifua Maloloina ma le aufaigaluega. E talitonu o le malu o la outou galuega aemaise o lo outou tutuaai, aua le puipuiga o lo tatou atunuu, mataituina foi o le fegasoloai o le mamalu o le atunuu i le agai mai i Samoa, ia o lea lava e gafa ma la outou Matagaluega. Malo faafetai. E i ai foi nai nisi o vaega laiti, ia o lea tatou te maua mulimuli ane e tai toatasi e maua i le faamai, ae o lo o malu pea aemaise o lo outou loto tetele i puipuiga. E talitonu o lo o agalelei pea le Atua e malutia lo outou soifua. Aua o outou lava o lo o pito i luma ae o matou lea o lo o mulimuli atu i tua. O lona uiga a mamai outou, ua afaina atu ai foi ma matou i tua. Ae peitai o lea lava lea e leai lava se isi o la outou Matagaluega o afaina. O le faafetai tele lea i le Atua ma o le tatou tatalo fai faatasi foi lea.

Ia o le isi vaega lau Afioga i le Minisita, se i toe silasila ane lava i le tatou CT Scanner lea, po o le a se tulaga o i ai? E talitonu e tele foi le taua mo le tatou atunuu aemaise lava i ai latou o lo o manaomia ia togafitiga.

Ona ou oo mai lea i le Minisita o Tina ma Tamaitai, talitonu o lo o sii gasegase le Afioga i le Minisita. Ia e i ai foi nai atugaluga laiti, ae o faiga lava ia o le soifua ma le ola. A taumafai foi i se mea lelei ae i ai foi faapena. Ia, ae le faavaivaia ai le ola taumafai ma le ola sailimalo aua le lelei o le itumalo.

Lau Afioga i le Sui Minisita o Tina ma Tamaitai, o lea ua faataoto mai taiala aua la tatou \$200,000. O le mea lea e tau avatu ai se tuualalo a lenei itumalo. Ua ou tilotilo i la matou itumalo e fai si maaleale ona e mauga aemaise foi e tulata i le sami. E tilotilo lava i le tulaga i le faamoemoe i le \$200,000 lea, ona o lea ua faapea mai, e ese le toafitu o tina, fitu ia alii, ae Taitaifono le sui usufono. Ae i ai la ma le isi vaega e toatolu e faaogaina le

ofisa. O le tuualalo a lenei itumalo ma le afioga i le sui Minisita. O au o le faipisinisi, Geogies Pizza ua leva, 23 tausaga o faatu. O le taimi na suia ai auala, faatu ai le Kava Rentals. Ua ou avatua le faataitaiga lea, o le Komiti lea a lo matou itumalo, o lauia uma lava. A o lea e pei e faalogologo atu ma maua foi, e pei e foliga mai e i ai se vaegatupe lea o le a toese mai i le \$200,000 lea o le a totogi ai le vaega lea e toatolu. O lau tatalo, o le a le mea e le faapafala ai lena toatolu, aumai atoa lava le \$200,000, faaaoga atoa lava mo manaoga o lou itumalo ia aafia uma ai tagata. A lea le toa 15 ia, o lauia, o lau tuualalo, aua a faapea e \$200,000. O se faataitaiga, a ave le \$80,000 e totogi ai le toatolu lea, e na o le \$120 lea o le a faaaoga. A o le 15 lea, o ni tagata ua matua i ai le tomai eseese. O tamalii foi o tupu ma ee o tina ma faletua o la e afifio ma papaaao i le itumalo, latou te iloa lelei. O le naunautaiga o lou nei sui usufono ma le tuualalo i lo tatou Malo. E toe alu ai fua lea seleni i lea vaega. Ia aumai uma le \$200,000 ona faaaoga lea i totonu o lou itumalo i afioaga taitasi.

O se tuualalo e lafo atu i lau Afioga i le sui Minisita, a o lena lava e i ina le uta a le fai mea lelei.

Ona ou see mai lea i le Minisita o Faatoaga ma Faigafaiva. O lea ua matauina, o lea ua faataoto nisi o fuafuaga alualu mamao aua gasologa a le Matagaluega aua se lumanai manuia o lo tatou atunuu ma le aufaifaatoaga. Sa ou matamata lava i le tausaga talu ai, i le faatinoga o le mea lea o le talo mua. Ou nofo lava ou faapea, o Fagaloa e faalea ai le talo. E maua le talo i lo matou itumalo, ae o lona laueleele e le o se eleele e fai ai ni faatoaga tetele e auina atu i fafo.

Ona ou mafaufau loa lea i le mea lea o le ava. E manaia pe a fai se ava mua i lou itumalo, pe faapea Fagaloa avamua. O le avamua numera tasi o Fagaloa. Aua o le eleele o le eleele lava o le susu, o le ava.

O le isi talosaga i lau Afioga i le Minisita, e 2 lava tamaoaiga o si ou itumalo. O meataulima ma le ava. O le mea lea ua tulai mai i le faafitauli lea ua i ai, e leai se isi o tatou e tio. O lea ua faaletonu mai fafo, ma ua le mafai foi ona auina atu le tele o meataulima, aemaise foi o si o matou itumalo. E pei o lea sa agai mai i Apia, sau le turisi ona o loa lea ma le tele o le tamaoaiga o meataulima mai i lou itumalo. O lau tatalo i lau Afioga i le Minisita, pe le ono fai ni nai ponesi. Faataitaiga, a faapea e tasi le pueava, ua \$1, se i tau uunai ai foi si ou itumalo. O le latou lava lea tatalo. O lea ua faafogafoga mai si ou itumalo, o lea lava ua faatino lo outou manao, pe maua se \$1. O le mea foi ua tupu i le toatele o fanau talavou, ua faamoemoe lava i le mea lea. Ua faamalo o lena ua outou nonofo i fafo i le suasusu ma le meli. O fafo ua leai se suasusu ua leai foi se meli.

FOFOGA FETALAI: Ua ou vaelupeina le saunoaga a le sui usufono mamalu. Ona o lea ua taunuu i le taimi mo le tatou malologa. O le a toe faaaauau lau saunoaga pe a tatou taliu mai i le tatou malologa.

Ou te faasilasila atu o le a faataatiaese Taulumaga a le Fono Aoao Faitulafono mo lana malologa masani mo le 15 minute ae o lea o le a tuu atu i le 25 minute la tatou malologa.

Na faataatiaese Taulumaga a le Fono Aoao Faitulafono mo lana malologa masani i le itula e 7:45 i le po ma toe faaauau i le itula e 8:25 i le po.

FOFOGA FETALAI: Ou te faasilasila atu ua toe amatalia nei Taulumaga a le Fono Aoao Faitulafono. E i ai le manatu ua matu i fau le taligasua i le paia i le Palemene. Ua maua foi si faasiligamalosi faaopoopo e faamaea ai la tatou galuega i lenei afiafi. E faamalo foi i lo tatou Ofisa mo tapenaga aua le tautuaina o le Palemene.

Ae le i faaauauina le tatou galuega, e na o se fesoasoani o le Nofoa mo tapenaga o a outou saunoaga. E tatou te manatu foi o le Tala Faaopoopoga o le Tupe ua na o ni nai faaopoopoga mo vaegatupe na faamaonia i le Tala Autu o le Tupe. I le ma le isi, ua na o ni nai Matagaluega laititi ua aofia i le Tala Faaopoopo, o lo o tatou talanoaina, ae le o Matagaluega uma a le Malo. Aepeitai o lo o agai saunoaga i Matagaluega uma mo talosaga manaomia a o tatou itumalo, ae le o i ai ni vaegatupe faaopoopo mo ia Matagaluega i le tala faaopoopo lenei.

O le ala o le faamanatu o le Nofoa, o lo o tagatasi lava saunoaga a sui mamalu i Matagaluega uma lava a le Malo, mo mataupu talosagaina. A e o le tele o Matagaluega e le o aofia i le Tala Faatatau Faaopoopo o lo o talanoaina nei. Ua na o se tuualalo ma se fautuaga a le Nofoa, e manaia le agai tonu o saunoaga na o Matagaluega o lo o i le Tala Faaopoopo o le Tupe, o lo o tatou lauliliuina. E le mafai ona faaopoopo manaoga o o tatou itumalo, ae leai se vaegatupe faaopoopo e faatupe ai.

O le lelei foi o le tulaga o lo o taumafai atu ai, e sologa lelei ai le tatou galuega ma mautinoa ai, o lo o agai tonu saunoaga i vaegatupe o lo o i le Tala Faaopoopo o Tupe ma tuuina atu i le Komiti mo le iloiloaina. Ma o lea ua toe lipoti mai ai le Komiti. Ua na o se fesoasoani mo le lelei faagasolo o le tatou galuega.

E faataatiaese Taulumaga o lo o saunoa le sui usufono mo le Vaa o Fonoti. Ou te tapa lau afioga i le sui usufono mamalu e te tulai mai e faaauau lau saunoaga.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai pe maua se avanoa, e tulai ai ma le faaaloalo.

FOFOGA FETALAI: Ia tulai mai lau Afioga i le Fofoga Fetalai.

Tofa Hon Lauofo Fonotoe Nuafesili Pierre Lauofo: E talu ai ona o le Tala o le Tupe, o lea tatou te agai i lauga faalauaitete. Po o le sao la o lou finagalo, e agai i lauga faalauaitete i Matagaluega o lo o aafia i le Tala Faaopopo o le Tupe, po o le a tonu, po o vaega ia e aumai ai teuteuga o tupe fetuunai. Aua e pei o le tulaga sa masani ai, o saunoaga faalauaitete lava, ae o lau Afioga lava e i ai le pule, e faatonutonufolau le tatou Fono. E na ona tulai e fesili i le tau faamaninoina atili o lou finagalo faamolemole.

FOFOGA FETALAI: Ia malo faafetai i le saunoaga a le sui Taitai, e pei e agai le fautuaga a le Nofoa, ona e alofa foi i itumalo i le faafogafoga mai, ae le o i totonu o le Tala Faaopopo o le Tupe. E pei o le agaga lena, o lo o i le sui usufono mamalu lava ia le taua o lana saunoaga. Ae ua na o se fautuaga e tuu atu i autafa o a outou afioga i sui usufono mamalu. Ia o le agaga lena o le Nofoa. Ma le agaga faaaloalo.

E tapa lau Afioga i le sui usufono mamalu mo le Vaa o Fonoti mo le faaauauina o lau saunoaga.

Tofa MAUU SIAOSI PUEPUEMAI: Faafetai i lau Afioga i le Fofoga Fetalai, i le avanoa e toe faaauau ai foi le lauga a lenei itumalo. E i ai le talitonuga o lea ua talanaifala foi le taliga o le sua, ua maua foi se faasiligamalosi i le paia maualuga o lenei Maota.

E faaalua foi le agaga faafetai tele i le Ofisa, e tusa ai ma le manaia ma le matagofie o le kale mamoe. E pau lava le tuualalo, ia tau faalapopoa laititi, ua manaia foi lea. Ae faafetai mo mea uma aua foi le faamalosiga a le Palemene.

E maea se leo o lenei itumalo o i ai pea i le Minisita o Faatoaga. O talosaga foi aua o lea ua uma ona folasia e lau Afioga i le Fofoga Fetalai, e agai tonu lava ia lauga, i le Tala Faaopopo o le Tupe, ona e i ai nisi o Matagaluega, o lea e le o aafia ai i le faaopopoga lea. Ai lava o se mea faiaina lou amata i le tele o Matagaluega e le o aafia ai.

O lea ua oo tonu mai lava, fetau ma lau saunoaga. Ae o Matagaluega ia, o lea o lo o aafia i le tupe lea i le faasoaga, o lea la o le a ou oo atu loa i ai faafetai.

Lau Afioga i le Minisita o Faatoaga, e talitonu ua i ai se fuafuaga a lau Afioga ma le Matagaluega. A o le tatalo a lenei itumalo i le tulaga lea o meataulima. Ia silafia foi, o le tele o afioaga o lenei itumalo, o le tamaoiga lea sa tua i ai. O le toatele foi e pei ua nofonofono ona ua leai se turisi. E pe le o i ai se faamoemoe e faatapena ai se pusa tele, container e faamoemoe e ave mo ni maketi i fafo, ina ia tuuaititi ai le vaega lea, o le tauvalaau lava i aiga i fafo, i le tele o le mau faalavelave. Ua se toa foi le mamalu o aiga o lou itumalo i fafo, ua valaau atu lava. Ua oo lava i le suka ua valaau lava. O le

mea lea e tatalo atu ai i lau afioga po o i ai se faamoemoe mo le tulaga lea, i meataulima i le auina atu i fafo.

O nisi o faamoemoe o lea ua maua, e momoli atu ai le agaga faafetai tele. Ona o nisi foi o fuafuaga alualu mamao a le Matagaluega o Faatoaga ma Faigafaiva, aua le alualu i luma o le atinae o le Malo ma ona tagata.

Ona ou see mai lea i le Minisita o Tupe Maua. Ou te talitonu o le isi lea Matagaluega o le fatu o lo tatou Malo, aemaise lava o le aoina mai o tupe maua, aua le atinaeina. E avatu foi le faamalo i lau Afioga i le Minisita aemaise foi o le Ofisa Sili o Pulega o le Matagaluega. E matauina e lou nei foi sui usufono, e na o se tuualalo ma se fautuaga e momoli atu, e tele la outou galuega e le faigofie. O outou le isi Matagaluega e galulue i le tele o le taimi i le ao, e faapea foi i le pogisa. O le matauina foi e pei ona talanoa i le Afioga i le Minsita o Leoleo i le faaofiina mai lea...Ou te talitonu, o le faitotoa pito i lautele lea, o lea o lo o ulufale mai ai le tele o fualaa faasaina, aemaise o laau malosi. O lena foi ua faailoa atu, talanoa foi nisi o lou itumalo matutua, ua faitau i le 90 tausaga, sa le faapena i ia aso. Ae peitai o lenei foi vaitau ua tele le suiga. Ua latou matamata foi i televise ma tulaga faapena, o lea e molimauina ai ia tulaga ia.

O le mea lea lau afioga, po o le a se tulaga i le scanner, ua alagataua loa, ae aumai loa, ae faatino loa le faamoemoe lea. E talitonu foi o le fesoasoani tele lea, e le gata o le Pulega aemaise o le afaigaluega. O tatou taifau tulou le Maota, na faafofoga foi le atunuu, e le gafatia e le taifau lea e tasi ona faatino le galuega tele. Ae matauina pea, o lea lava e foliga mai o lea e faatupulaia le vaega lea i le tatou atunuu. O le mea lea e talosaga atu ai i le Minisita po o le a se fuafuaga o i ai. E na ona tuualalo atu, avatu fautuaga ona o le malupuipuga lava o le soifua o le tatou atunuu ma ona tagata. O nei foi vaitau ua ese lava le tulaga ua i ai, o lea foi ua molimauina, e pei o le toatele o i latou e tamaoaiga i le seleni, e pei o lea e faatino le vaega lea. E le mafai e se faipopo tulou po o se faatau esi i le maketi ona afford le tau o le fualaa lea ma laau malosi. O le mea lea, se i toe silasila ane lava lau afioga ma le Matagaluega i tulaga ia. A o tulaga uma i le galuega faatino a le Matagaluega, ma matou matauina. E talitonu foi e le o nofonofa foi i le tau aoina mai o tatou seleni aemaise o le matauina i tai i le uafu.

O le isi vaega lau Afioga i le Minisita o le system o le TIMS. O au o le faipisinisi, o le tuualalo a lou nei sui usufono, ua talanoa mai nisi o fai faleoloa a lo matou itumalo, e le na ma le laina. E tele atu le aitalafu i lo le faatau. Aua o le mea lea e tupu nei ia i tatou, a aitalafu, alu i le fale o le Samoa, ae a faatau ua alu i le fale o le Saina. E le malamalama po o le a le mafuaaga. O le mea lea lau afioga, pe le mafai ona....

FOFOGA FETALAI: Ia tulai mai le Minisita Lagolago o Tiute.

Afioga Masinalupe Makesi Masinalupe (Lefaga ma Faleaseela): Ia faafetai mo le avanoa. E le faalavelave i le sui usufono. E pau o lea mo le faasaoina o le taimi, o lea sa e malele e le toe taua le tulaga e pei ona i ai ni Matagaluega po o ni... o i ai ni tupe faaopoopo. E le o i ai le vaega lea o Tupe Maua. E le o i ai se tupe o faaopoopo mo le...i totonu o le Tala Faaopoopo o le Tupe. O le mea lea e fesoasoani atu ai mo le faasaoina o le taimi, e faaauau le saunoaga i nisi Matagaluega. Ma le faaaloalo lava.

FOFOGA FETALAI: Ou te iloa a faafogafoga foi i le saunoaga a le sui usufono mamalu, e pei o lea e agai i pisinisi ne i te i ua...o lo o i ai foi le Matagaluega o Pisinisi ma Alamanuia, atonu e tau latalata ifo foi i ai. Ia malie le Minisita Lagolago, o lea lava e faalautele le saunoaga a le sui usufono.

Tulai mai lau afioga i le sui usufono mamalu. O lena ua e faafogafoga mai, e le o aafia le isi Matagaluega lea. Ae saunoa lau Afioga.

Tofa MAUU SIAOSI PUEPUEMAI: Ia faafetai lava i lau Afioga i le Fofoga Fetalai. A e agai i Vaitele, e i ai le sign tele lena e tu mai faapea, o le upu la e matamata tetele ai, ia to'a i taimi uma. O le mea lea lau Afioga i le sui Minisita, ia maua pea lou to'a, atonu e aoga foi e piopio piopio lava sao.

Lau Afioga i le Minisita o Tupe Maua, o le a avatu se faataitaiga ona o le pizza. O le pizza o le price a lea ua 10 tausaga. O le tausaga talu ai seia oo mai i le taimi lenei, ua alu i luga le tau o le sisi, ua alu i luga le tau o le fuamo. O le popolega, afai e tumau ai pea le price lea o le pizza, e ta atu Me ua le faatau pizza ia tagata. Aua ua tele ua taugata le...ae aveese le pisinisi lea e i ai matou. Ua lava lava le aumatutua e lavea i le TIMS ae faapafala laititi matou lea e i lalo mai, se i tau sue mai ni tamai mea i lenei vai tau. Aua o pisinisi nei sa faamoemoe foi i turisi mai fafo. Aua e leai se palagi e alu alu lava sau faatau se fai i le maketi, pe se aiga mamoe e saka i le sosi. E lua lava faleaiga, e taumamafa ai turisi sa agai mai i Samoa, o le Mc Donald ma le Geogies Pizza. O le mea lea e tatalo atu ai i lau Afioga, leaga e i ai le vaega lea o pisinisi e pei o au, e lavevea ai. Ae o le a tuu atu pea i ina, e talitonu foi o lena e i ina le faitonu o mea lelei.

FOFOGA FETALAI: Ia malie le sui mamalu se i tulai mai le sui o Faleata.

Tofa Lealailepule Rimoni Aiafi: O lau fesoasoani i ai i le afioga i le sui usufono, ne i te i ua galo ia ia, e le o ia se fai pizza o ia o le sui usufono. Ma le faaaloalo lava.

FOFOGA FETALAI: E taua foi le fautuaga a le sui o Faleata 3 i lau afioga i le sui mamalu. Ua lava ia le tau soo o au pizza i totonu o le Maota ae agai tonu i le tatou mataupu, e pei ona tatou talanoaina.

Ma le agaga faaaloalo lau afioga i le sui usufono mamalu.

Tofa Hon Olo Fiti Afoa Vaai: Lau afioga i le Fofoga Fetalai...

FOFOGA FETALAI: Se i tulai mai le afioga i le Minisita o Galuega Tetele...

Tofa Hon Olo Fiti Afoa Vaai: E na ona ou fesoasoani atu ma fautuaina Lealailepule, na pau lava lea o lana tama feoloolo? Ae taofi ni ana promotions o ana pizza i totonu i i leai o le Palemene le mea lea e fai.

Tofa MAUU SIAOSI PUEPUEMAI: Ia faafetai i lau afioga i le Fofoga o le Fono...

FOFOGA FETALAI: Malie le sui usufono mamalu e faaauau mai lana saunoaga ua uma foi le 30 minute.

Tofa MAUU SIAOSI PUEPUEMAI: Ia e talitonu lava o lea e manino ia upu foi o leni itumalo. E aumai pea au e fai ma faataitaiga, ia o le faataitaiga la lea e taumafai atu ona ou oo mai lea i le Minisita o Galuega. Ia o lea ou te tilotilo atu i le faasoaga lea o lea e i ai le Minisita o Galuega, Olo o la e faafogafoga mai ia lou itumalo. O la e matamata mai i tamai mea faapea, faaleo le agaga faamalo ma le agaga faafetai.

Lau afioga i le Minisita aemaise foi le Ofisa Sili o Pulega o le Matagaluega o Galuega faapea le LTA e tusa ai foi. E ui lava o la e ua alu atu le kilia, faafetai tele faamalo o la ua amata ona feoloolo atu ia matou auala. Ia ae o lea ou te tilotilo atu i le seleni lea.. o afa i lou finagalo ae aumai uma loa e fai ai auala o Fagaloa. Ae faatalitali isi itumalo se i oo i le ogatotonu o le tausaga. Ia ae o tulaga uma, e avatu le faamalo ma le agaga faafetai e le faigofie foi ia lau faasoaso. E tele foi manaoga o itumalo ua lalafo atu, ae o lea e matau atu, ia o lea e utiuti ia le faaso.

Tau lava na ona ou faamanatu lau afioga i le Fofoga Fetalai, o Fagaloa e leai ni ona auala galue, o lo o tele pea ia vaega lelei o le auala, ia ae ua tele foi ma vaega ua tele le faaletonu. O lea ua avanoa lau taavale, e pei foi ona ou talanoa atu ananafi, a i ai sou avanoa i le vaiaso leni, e utu lava e Mauu le taavale ae se i e tilotilo ma e tagai i tulaga o lo o i ai nei. O la ua toe foi lava Fagaloa i le tulei o taavale i le isi pioga. Ia na ona ou faamanatu atu faapena, ia tulaga o la e i ai si ou itumalo. O la e faafogafoga mai.

Ia lou itumalo, ia o lea lava ua faaleo ia outou manaoga, ma e le mapu foi ia la outou sui usufono, ia e faamanatu pea i le afioga i le Minisita ma le Matagaluega ia e fai si o latou pisi.

Ia ona see mai lea i le Minisita o Tupe. Ia malo faafetai i lau afioga i le Minisita faapea foi ia le Ofisa Sili Pulega ma le Matagaluega ia i le tau tapenaina foi o lea lipoti. Atonu o lea lava e te manatua ia upu sa ou lauga ai i le lauga faataupou. O le tatou tamaoiga e maaleale, aua le naunau i le ia ae manumanu i le upega. O lea ua matauina i le Tala Faaopoopo Muamua, ia lea ua amata le galuega. O le mea lea e momoli atu ai le faamalo ia aemaise foi o le faafetai mai i lenei itumalo, ia ona o lea faatoa amata le faamoemoe, ia ae o lea ua matauina, o lea lava ua faasoasoa ia aua nisi o Matagaluega, ia lea foi ua ave le faamua o lo o i ai le manaomia ma ave i ai le faamuamua.

Ia ae o le tatalo foi a le tatou itumalo e pei ona talanoa atu i lau afioga i le Minisita o Tupe ia o taua lava o le ta itumalo e pau o le mea o palota a ua eseese, ae o taua lava e tasi. Ia aumai foi se isi \$1 miliona e faaopoopo i le \$1 miliona a le Minisita o Galuega, vave loa ona faatino auala o le Vaa e tasi. Ae faaleo atu le agaga faafetai tele e tusa ai o tapenaga uma, ia e le faigofie o mea lava nei o tupe, o lea lava ua o tatou iloa, o faalapotopotoga, ekalesia, aiga, aulotu ia o le tupe lava e vavao ai. Ae peitai o lea ua matauina, e le faigofie ia outou galuega aemaise foi o le Ofisa ma le Matagaluega.

Ia muliai se matou tala lau afioga i le Fofoga Fetalai, e talitonu e tatou te le o mafuta ma le Taitai o lenei foi Itu, aemaise foi o le Minisita o Tina ma Tamaitai ia o lo o aafia foi i gasegase, ia o le tatalo foi a lenei itumalo, agalelei le Atua, ia taulu taulu lona agalelei alofa, ia toe faafoisia le malosi aua foi le faaauuina o tiute aemaise o le valaauina o tatou i ai.

Ou te manatu foi o lea ua maea nisi o manaoga. E pei foi ona taumafai atu e faamanatu atu, faamanatu atu lava ma toe talotalo atu. Ia talitonu o lea o le a liuliualo maia a outou afioga e faatino si nei itumalo. A tou taamilo ia Samoa le auala, e na o Fagaloa e te alu atu e agavale i ai manatua ane i la outou faasoa.

Lau afioga i le Tamaitai Palemia, lau afioga i le Sao Faapito, ia malo le folau malo foi le pale, malo foi le onosai. Ia a matou tetele atu, ia e talitonu lava o oe o le tautai ia aua le tatou Faigamalo. Tatou tatalo faafualoa e le Atua le soifua, maua lou malosi i le tino faatamaoigaina i la le agaga, ia ma faatumu pea lau utu i le utu o le alofa. E te alofagia ai ia Samoa ma ona tagata.

Ia manuia foi lau afioga i le Fofoga Fetalai, talitonu foi e le faigofie foi ou faiva i le faafoefoeina o le tatou Palemene, ia ae o lea lava e matauina o lea lava e te faatamalii ma faatupu le faiga o tatou Fonotaga. O le mea lea e momoli atu ai le agaga faafetai tele ma le faamalo ia e tusa ai ma galuega fitaituga. Ia manuia le Fonousu a le atunuu, manuia foi si ou itumalo, ia o si ou toalua ma si au fanau ia ae ou ola i le alofa o le Atua.

FOFOGA FETALAI: Ia malo saunoa, ia faafetai i le sui usufono mai i le Vaa o Fonoti mo le saunoaga malamalama ia aemaise foi o lea e matau atu e le Nofoa, e leai o lea lava e te saunoa lava ma savali mo si ou itumalo. O le mea lea malo faafetai. Ia e i ai foi ma nai meaalofa o lau pisinisi o lea lava ua maua atu e le Nofoa, ia malo le alofa faamaoni i le itumalo. O le mea lea ia faafetai mo lou sao.

O le taua foi, o lea lava ua lilifa saunoaga i Matagaluega faapitoa o lo o aafia i le tatou Tala Faaopoopo o le Tupe. O le mea lea malo le lagolago i le tatou galuega, faafetai saunoa.

Ia o le avanoa lea i se tasi sui usufono mamalu, manaia foi le felafuai le tatou galuega. O lea e matau atu o lea ua sauni mai le tiakono toeaina mai i le Matagaluega o le Itu o Tane, o le sui usufono mamalu mai Gagaemauga Nu.2 ia o lou avanoa lenei.

Tofa SEUAMULI FASI TOMA (Gagaemauga Nu.2): Faafetai i le avanoa i lau afioga i le Fofoga Fetalai. Ua talafeagai lava le malu o lenei afiafi, ia ma le faamoemoe e tusa ai ma lou tulai atu.

E i ai le fonu e taua e lo matou nuu o le fonomaaitu, o le fonu lea e fai i le po. Ia e na o sina tamai moli itiiti lava, ia aemaise o le faatinoina o le fonu. Ua i ai la lou taofi, ia o le taimi tonu lea e tatau ona fai ai le lauga a Gagaemauga Nu.2, faafogafoga mai ia ilamutu o lenei itumalo o lenei nuu, ae o lea se i fai se sao o lenei itumalo.

Ou te tulai atu ma le loto maualalo, e tautala foi ma le faaeteete, i le maualuga o lenei Palemene. Ae se i taumafai atu se sao o le usugafono a lenei itumalo, aua le Tala Faatatau Faaopoopo o le Tupe 2021/2022 ua i luma nei o le Laulau a Fonu a le Palemene.

Lau afioga i le Fofoga Fetalai, ao le i folasia i luma o le Maota fonu se faatauvaa ou te muai muamua ona faatulou ma faatalofa atu i le paia o lenei Palemene, le afio o lau afioga i le Tamaitai Palemia, afio lau afioga i le Sui Palemia, afio a outou afioga i Minisita o le Kapeneta. Faatalofa atu i lau Afioga i le Sui Taitai o le Itu Agai, aemaise le paia maualuga o le afio o sui usufono mamalu o le Palemene o itumalo e fia o le tatou atunuu. E ui foi ina taulia i le fala ma le falaefu, le faataotolia ai i apulu i tofaga o le afioga i le Taitai o le Itu Agai, aemaise foi o nisi o afioga i Minisita, o sui usufono mamalu o le Palemene, o lo o soifua le Atua. Ia tatou faanonomanu, ia taulu taulu, toe faafoisia se laulelei, aua tiute ma valaauina.

Ou te muai faatalofa atu i le paia maualuga aua Ofisa Sili o Pulega o Matagaluega ma Faalapotopotoga Tumaoti a le Malo, i lo outou fitaituga aua le tautuaina o le tatou atunuu. E faatalofa atu i lau Susuga i le Failautusi, aemaise le mamalu o le Ofisa o le Fonu Aoaofa Faitulafono, ae a le paia maualuga o le au galulue aua le tausiga o le filemu o lenei Maota.

Faatalofa atu i le tapuaiga a Samoa, malo le soifua, talofa lava. Faatulou atu i le tapuaiga mamalu a Samoa aoao. O ou paia ma mamalu Samoa, o lea

ua maea ona tosi faati. Ua mamanu faatiti saunoaga ma fetalaiga a sui usufono mamalu ua maea ona sausaunoa i itula ua mavae. Pe oo i ai se leo o lenei itumalo pe le oo foi iai e le mafai ona aveesea, pe faaopoopo i ai ia paia ma ia mamalu aua o paia e tumau ma mausali.

O le paia e o si ou itumalo, o le tapuaiga a Gagaemauga Nu.2, e tou te silasila lava i lou tino i faaiuga o vaiaso uma. Po o le a lava le mativa o la outou sui usufono, ae o le tatou mativa faafesagai. E amata atu i Fanuatanu i Titele Matautu, Siliga ma Falefaamaoi, tainane foi o Avaio Malae ma Maloamata, ae matua lava le tuu```` i Tupua i Falefagamalo ma Toalepai o tua o Vaituutu.

E faatalofa atu i le tapuaiga i tamafanau a si ou itumalo, o lo o afifio i so o se tafa o le lalolagi, faafetai e tusa ai ma outou faamanuiaga o le tausaga fou, aemaise o lo outou faamalosiau, ma a outou faamanuiaga aua le usugafono a lo outou sui usufono i le Paeaiga lenei. Malo le soifua, malo, talofa lava.

Ia oo mai lea o se leo o lenei itumalo, e tusa ai ma le Tala Faatatau o le Tupe, lea ua taoto nei i lumamea nei. E matou te muamua atu i le afioga i le Minisita o Galuega, faafetai e tusa ai ma galuega lelei. A ou tu ma ou tilotilo faatagata tautua i le taimi o le Faigamalo lenei, ma ou faitau i le taimi ua tuanai i lena tausaga, o lea faatoa 5 masina, 3 vaiaso, ma le aso e 1 lenei, talu ona tulai mai ia le Faatuatua i le Atua Samoa aua le faatautaiga o le sa o Samoa mo lenei Paeaiga. Ua 5 masina, 3 vaiaso ma le aso e 1, faafofoga Samoa ma o tatou faamasino ma tausaga e tele ua tuanai, o lena e tilotilo i ai ia lou matai tautua. E fua e oe ma faamasino e oe, ma o tatou faia le faaiuga.

Ae a ou matau i saunoaga ma fetalaiga a sui usufono mamalu o le Palemene, o lo o agai lava talosaga, suavai, auala galue, o le falemai, o lea lava e faatupulaia. Ou tepa lea i tua, o le a le mea sa faia i ia tausaga tele ua tuanai?

Lau afioga i le Minisita o Galuega, faafetai tele lava, o lena ua tauaao atu i ou aao, tusi talosaga a lenei itumalo i nisi o vaega e fia faaleleia. O le louta a lenei itumalo, e amata atu lava i le Gagaemauga 1 seia paia le Gagaemauga Nu.2, a e savali atu i tai i le aai e tau i uta i Tualava, e 2 itula 20 minute. E te savali ai e aunoa ma sou malolo, fua mai o le matua mamao lava. Seiloga o le toa faatoa maupaolo atu i le itumalo lenei. E mamao, o le matua mamao lava. O le mea lea lau afioga i le Minisita, o lena ua o matou talanoa atu, ua avatu foi i ou aao tusi, ia o lena e taatia i ina le utu a le faimea.

O se patupatu mo le nuu o Lelepa, leaga o le falesa le ituala i uta, ae o le maota o le faifeau le ituala i tai e fai ai ia le Aoga Aso Sa. E tasi lea faaeteetega a le faifeau aemaise o le Ekalesia, o alo ma fanau aemaise o le saoga lea, e fai lava sina saosaoa o taavale. Ia o lena ua taatia atu i ina i lau afioga i le Minisita ma le Matagaluega aemaise foi o le Minisita Lagolago ua fia i ai tusi, ia ae o lea lava e le i tali mai.

Ia lau afioga i le Minisita, e matua to lava lou pulou i le taimi na poloka ai ia alavaa, 2 aso, matua to lou pulou i lau afioga i le Minisita i le tofa e te le o moe. E te tu atu i Mulifanua, ia ae o la e tulai mai ia lau Minisita Lagolago i Savaii i Salelologa. Faamalo faafetai, o le taimi lea na moomia ai e Samoa ni taitai e tulai mai. O le taimi e fia malaga mai ai o Savaii i Upolu nei, faapea foi Upolu e o atu i Savaii.

O le mea lea e momoli atu ai le faafetai i lau afioga i le Minisita, e pau lava o lenei, e le o i ai ni avanoa la ea lau afioga i le Minisita mo femalagaiga a o tatou vaa e faaavanoa ae mo taitai o ekalesia aemaise o afioga i sea, susuga i toeaiina, o so o se ekalesia, leaga e i ai taimi e valaau atu ai ia fono faafuasei, ia ae omai ua tumu. O le ala lea e tatalo atu ai i lau afioga i le Minisita, pe le o i ai ni nai avanoa foi ia e faaopoopo mo ni faamoemoe faapea ia aua o taitai uma lava o ekalesia e le faapitoa i se ekalesia se tasi, ekalesia uma lava. O le taimi e valaau atu ai ia fono faafuasei, ia ae o la e maua se avanoa.

Ia ona ou oo mai lea i le afioga i le Minisita o Leoleo, faafetai i lau afioga i le Minisita i le talia o le talosaga o lenei nuu mo le faamamaina o le lotoa. E matua to lou pulou i le auaunaga ma le soifua tautua i le afioga i le Sui Komesina ma le mamalu o le Matagaluega i Savaii. O fea lava pou o Savaii o Asau, o Vaitoomuli o Tuasivi ma Fagamalo, e ese le mataala i taimi o aso fiafia. O le pisi o le Kerisimasi ma le Tausaga Fou, e ese le mataala o le faatinoga o galuega a nai leoleo. O le mea lea e momoli atu ai le agaga faafetai i le afioga i le Sui Komesina, aemaise foi o taitai ma le paia o le aufaigaluega a leoleo i Savaii e tusa ai ma lo latou soifua tautua. E po lava o fai poloka aemaise o le taimi o taumafa le ava. E momoli atu le agaga faafetai tele e tusa ai mo le auaunaga.

Lau afioga i le Minisita o le mea foi lea o le sainia o lipoti o tagata foi ia e o i galuega faavaitaimi. Ia aemaise foi o le taimi lea e sauni ai ia o tatou sui i le palota, ia na manaomia foi ia lipoti a le Matagaluega a Leoleo. O le molimau a si o matou motu i Savaii sa mafai lava ona saina i Savaii ia lipoti ia o le Matagaluega a Leoleo, ae o le taimi lenei, ua le toe mafai ona saina i Savaii. E faapena atu se agaga i lau afioga i le Minisita, pe le alagatau, o la ua afio i Savaii ia le afioga i le Komesina, pe le mafai ona saina ai ia lea vaega, ia e tusa ai ma lipoti ia o galuega faavaitaimi, aemaise foi o le soifua galulue pe afai e i ai ni galuega e fesiitai i ai le mamalu o le atunuu.

Ia o le tulaga i le fuimu, ia ou te masalo e le o pogisa i le faafofoga a lenei Maota lau afioga i le Fofoga Fetalai ia le faalavelave sa tupu i le ekalesia i Patamea. O le sau i Asau i Patamea e toeitiiti itula. O le alu atu i Saleologa i Patamea, po o le 35 minute. O le a le mea e le silasila ai lau afioga i le Minisita ma le Malo, na sau i le faalogo o le a fai se fale fuimu i Vaipouli. O le tasi lea fanua a le Malo e le tau faanoia pe... o fanua o le Malo. O le sau i Vaipouli i Patamea pe a faapea e tupu se faalavelave, e na o le 5 minute, ae

a maua lava se taavale se tasi, ia ona sau lea o lena tasi e tau faatali ai le o atu o Salelologa ma Asau i le mamao.

O le mea lea e talosaga atu ai i lau afioga i le Minisita o Leoleo Falepuipui ma le Tineimu, ia aua le tulaga se taavale fuimu e faaaoga ai lena fanua i Avaio, i luga i le Kolisi i Vaipouli i le mea sa i ai ia le tatou aoga. Ia a le o lena foi, ia o lena foi e tele le lotoa i Fagamalo, ia aua o se lotoa tele tele le lotoa lea i le Matagaluega o Leoleo. Ia o la e tausii lelei e le itumalo ia le paia o le aufaigaluega.

Ia ona oo mai lea o se faamatalaga i le Minisita o Pisinisi Alamanuia ma Leipa, faafetai e tusa ai ma le toe tatalaina o Bingo. O lea ua faaauau e faagata i le 11 i le po o Aso Toonai. Lau afioga i le Minisita faafetai tele lava, leaga e pau lava lenei o le tiakono toeaina ma le faipule e vili Bingo, e saili tupe a le aulotu leaga o le tupe lava e atinae ai so o se mea.

O le mea lea e momoli atu ai le agaga faafetai ae pau lava lenei lau afioga i le Minisita, o le toe faafouina o le laisene. O le umi ia ona faataamilo, fetulinai solo, ae o le a le mea e le expire loa lava, manaomia le faafou na ona aumai loa lava, o la ua i ai le sainigalima a alii ma faipule. O le a le isi mea e toe suesue ai? Pau lava o le mea e na o le aumai lava o le lisi o tupe maua i lea masina ma lea masina, ia toe alu atu le faafouina o le laisene. Ia ae o le tulaga lea e i ai nei, tuli atu i i, tuli ae i o. O le mea lea e tatalo atu ai i lau afioga i le Minisita, o le mea e ese le faigofie ae nonofo lava tatou ma faafaigata. O le tatalo lena a lenei itumalo lau afioga i le Minisita, ia se i silasila ae i lea tafa.

Ia tulaga i mea o pisinisi, lea na pei e maua e se isi o sui usufono mamalu, a faatau ua alu i le fale o le Saina, ae a aitalafu, ia ona tolotolo mai lea i le Samoa. E pei lava ona matou fai atu i lau lauga faalauaitele, e le mafai ua lava ia Salelologa e fai ai pisinisi ia a Saina. Ae tuu mai nuu i tua e saili ai seleni a nai aiga ma tagata faipisinisi i tua e tautua ai le nuu, tautua ai le lotu ma fai ai faalavelave o aiga. O le mea lea e na ona taatia atu lava i ina i ou tafatafa i lau afioga i le Minisita ma le Malo ia aua foi lea vaega.

Ia lau afioga i le Fofoga Fetalai....

FOFOGA FETALAI: Ia ou te fautuaina le sui usufono mamalu, ia e leai se agaga e faalavelaveina le saunoaga matagofie. E na o se fautuaga pea a le Nofoa ia tatou saunoaga ia aua foi ne i o tatou faailoga tagata ia tatou saunoaga, ia aemaise foi ia nai o tatou uso o fesoasoani foi i le atunuu. O le mea lea e lelei lava ia le tuusao o tatou saunoaga, fautuaga ia ae aua ne i atagia ia tulaga. Ma le agaga faaaloalo.

Tofa SEUAMULI FASI TOMA: Faafetai, ia ona oo atu lea o le faasologa a lenei itumalo i le afioga i le Minisita o Siosiomaga, ua lava le silafia o le Minisita i lenei itumalo. Ua leva foi na e faaafio ai i le vaitau o le 2010, 2011 i lenei itumalo i le faiga o poloketi.

O le vaega lea sa i ai le falemai tuai, i aso ia pe a ma le 20 tausaga talu ai pe a ma le 20 mita po o le 10 gafa i tai, alu atu i le aualatele i le apitagalu. Ae o le taimi lenei, e toe tasi le mita, aualatele, sami. E toe tasi lava se lologa, po o se galu aafia loa le aualatele, aafia loa le aualatele a le Malo. Ia tatalo atu i lau afioga i le Minisita, aemaise o nai aiga i le pitonuu lea o Lelepa i le ituala i tai faasolo mai i tai i le uafu, ua tele le aafiaga ona o le fesuiaiga o le tau.

O o i Avao i le faafesagai ma le tausaga matagaluega a le Metotisi, i le tai oooo lea sa i ai le sami talu ai sopo i le isi itu auala le galu. Ia na ona matou faamanatu atu i lau afioga i le Minisita se i e silasila ane e tusa ai ma lea vaega ia aua lava tulaga i taligalu a lenei itumalo.

Lau afioga i le Minisita o Faatoaga, faafetai tele lava, faafetai i lau afioga i le Minisita. Ua ta fiafia i le taimi lea sa leai ai se vaemoa. Ou faalogo i saunoaga a nisi ua faanoanoa ua leai ni pusamoa. Ua ou fiafia ua leai ni pusamoa se i tau faaoga atu ai ia size 2 ma povi la e atiae ai aiga. Aua na fai tonu lava ia lou faalavelave i le taimi lea na leai ai ni moa. Ia mo le manaia mo le mea o le atinae. E tago atu o le lafupuaa, tago ae o le povi. Ia ae o tatou e leai ni lafupuaa ma ni atinae, ia na ona leai lava o le vaemoa, ia faitio loa i le Malo. Ia ae momoli atu le agaga faafetai i lau afioga i le Minisita e tusa ai ma le faamoemoe lea e uiga i le fale o le a teu ai ia oloa a Savaii ia aua le faamoemoe mo le auina atu i fafo, aua a silasila i ai le mamalu o le atunuu, o si nei lava tamai faleoo la e faatino ai e se tasi o tamalii i Savaii ia le vaega lea. O le mea lea e momoli atu ai le faafetai i lau afioga i le Minisita ia e tusa ai ma lea tulaga.

Ia leaga o lea ua saunoa mai ia le afioga i le Fofoga Fetalai, i lau matau pe na o le 8 lava ia Matagaluega, o lea e aafia i totonu o le Tala Faatatau o le Tupe ia nisi nai vaega o seleni e faaauau ai masina o totoo o le tausaga faaletupe. Ia o le a toe taatia se isi vaega e pei ona iai nisi o Matagaluega, Matagaluega o Faamasinoga Matagaluega o Aoga, aemaise foi o Matagaluega o Fesootaiga ma nisi o Matagaluega o le Malo, ia aua le Tala o Tupe 2022/2023.

Ae o lau afioga i le Minisita o le Soifua Maloloina, faafetai tele lava mo le taavale. Faafetai mo le taavale a lenei itumalo e aumai ai gasegase i Tuasivi po o nei foi i tumua nei. E momoli atu le agaga faafetai i lau afioga i le Minisita, ua le faapitoa manu ia tasi, ae o lea lava ua e faasafua o lea lava ua oo mai i lenei itumalo, momoli atu le agaga faafetai. E faalua ai faafetai sa ou avatua muamua i le taimi sa o ta feiloai ai ma tauaao atu le taavale. Ia alofagia e le Atua lau afioga i le Minisita o le Soifua Maloloina, aua ou te matau atu, ia ua e gasegase foi, ailoga e uma lenei tausaga. Ia ae alofagia e le Atua lou soifua, ia aua foi le feagai ai ma tiute i le valaauina.

Ia ou te masalo ua gata mai ai nisi o vaega e fia talosagaina e lenei itumalo. Lau afioga i le Minisita o Tupe, ia o lea ua e saunoa i se taimi ta toe feiloai e tusa ai ma lau tusi na ave atu. E le o se tusi foi lea e faaleuo, ia ae o le tusi

ia aua le auaunaga a le Matagaluega, ia aemaise o le soifua tautua o alo ma fanau a le atunuu.

Ia ona faagata mai ai lea o se matou tala e tusa ai ma le Tala Faatatau o le Tupe 2021/2022 ia aua foi le feagai ai o le Palemene ma lana Fonousu i lenei foi vaiaso. Ia le paia e o le tapuaiga a lo tatou itumalo, e ui lava ina lagia ia le tatou tupua ona o nisi o valaau paia a le Atua i se tasi o tina o le nuu, ia aemaise foi o le lagia o Mutiatele ona o se tasi o tulafale, ia i ai le mafanafana o le Atua. Ae o le maliu e pei lava o upu o le tusi, 'e sili le aso e maliu ai i lo le aso e fanau mai ai'. O le valaau a le Atua o le aso fiafia, ua uma ona tuumatamaga e alii ma faipule, le fua faatatau ia le faamama aua le valaau i totonu o lo tatou nuu. Ia o le faamoemoe foi lea e i ai lo tatou Malo aua foi le tulaga i le valaau a le Atua, ia aua le soifua ma le ola.

Ia tatou tatalo faatasi aua le taulia o le fala i le afioga i le Taitai o le Itu Agai, aemaise foi le afioga i le Minisita ma nisi o sui usufono mamalu o le Palemene, ia o lo o i ai le le atoatoa o le malosi. Ia agalelei le Atua i le Fonousu a Samoa i lenei foi vaiaso.

Ia lau afioga i le Tamaitai Palemia, ma lou auvaa, ia maua pea lo outou toa. Ia toa pea outou finagalo, maua lo outou soifua maloloina i le tino aua le feagai ai ma valaauina e le faigofie.

Ia agalelei le Atua i le paia o lenei Palemene, soifua manuia i lau Afioga i le Fofoga Fetalai, lau Susuga i le Papaliitele, maua se tofa, e le gata i le faautauga o le sa o le Palemene o Samoa, aemaise foi o le laugaina o le upu a le Atua.

Ia, agalelei le Atua i Ofisa Sili o Pulega ma Matagaluega a le Malo ma Faalapotopotoga Tumaoti, manuia foi le Susuga i le Failautusi ma le Ofisa o le Fono, aemaise o le tapuaiga a Samoa, maloloina atu le Tiakono Toeaina i le alofa o le Atua. Ia soifua ma ia manuia.

FOFOGA FETALAI: Ia malo faafetai, malo sausaunoa i le sui usufono mamalu o Gagaemauga Nu.2 po o lau Susuga foi i le Tiakono Toeaina. E talitonu lava o lea ua aafia uma itu uma i au saunoaga, o itu faaletino o itu faaleagaga, ia ma lau faamalosiua foi i le tatou Maota. Malo faafetai. O lea foi ua oo i le taulia o le fala ma le falaefu i le Taitai o le Itu Agai aemaise foi lau Minisita ma se tasi o sui usufono, malo faafetai. Ua faafofoga le Atua i le tatou faamoemoe ma tatou talosaga aua lava le toe taliu mai mo tatou tiute ma galuega. Malo saunoa, faafetai lagolago i le tatou Tala Faatatau Faaopoopo o le Tupe. Ia malo saunoa faafetai.

O le avanoa lenei mo se tasi o sui usufono mamalu. Ia, o lea ua matau atu o lea ua tulai mai le sui usufono mo Faleata Nu.1 lau tofa Manuleleua Paletasala. Ia, atonu o lou avanoa lea ua tulai mai, ia saunoa ia lau Afioga i le sui usufono mamalu.

Tofa MANULELEUA PALETASALA T. TOVALE (Faleata Nu.1):

Lau Afioga i le Fofoga Fetalai, ou te manatu ua maea ona e paelago paia ma mamalu o le taeao ma le aso. E i ai le taofi e le sili mo'a i matagi, fai lena mo i tatou i lenei itula afiafi.

Lau Afioga i le Fofoga Fetalai, faafetai mo le avanoa ua ou maua. Ou te tulai atu ma lou faaaloalo se i avatu foi se manatu o lenei itumalo i le Tala Faatatau Faaopoopo o le Tupe o lenei tausaga ma nei masina o totoe o le Tala Faatatau o le Tupe.

Lau Afioga i le Fofoga Fetalai, e tulai atu ma le faaaloalo ou te faatalofa atu i lau Afioga i le Fofoga Fetalai. E faatalofa atu foi i lau Afioga i le Tamaitai Palemia le Sao Faapito, Fiamē Naomi Mataafa, e faapea foi le Afioga i le Sui Palemia.

E faatalofa atu foi i Afioga i Minisita o le Kapeneta, sui usufono mamalu o le Fono Faitulafono a Samoa i Sisifo.

Ou te faatalofa atu foi i Ofisa Sili o Pulega o Matagaluega taitasi faapea Faalapotopotoga tumaoti. O paia ma mamalu faale-Malo, faale-atunuu, e manatu o le a le toe oo i ai se faamatalaga, e manatu ua lava fetalaiga ma saunoaga i le taeao ua sola. Ia faia lena mo i tatou i lenei taeao mo le faasaoina o le tatou taimi.

A o le tulai atu ma le faaaloalo a lenei sui usufono o le Palemene o Samoa o Faleata Nu.1, lau Afioga i le Fofoga Fetalai, e le tele se manatu. Na pau lava lea, leaga e le o au o se fai pizza po o se fai malae vaalele, o au o le fai maumaga ma le faatautalo i le maketi i Aso Toonai.

Lau Afioga i le Minisita o Faatoaga, e muamua atu se faamatalaga. E momoli atu le agaga faafetai i le Afioga i le Tamaitai Palemia faapea lau Afioga i le Minisita ma le Minisita Lagolago, sui uma o le Kapeneta sa faapea ona auai i le Talomua a lenei itumalo, sa muamua i le tausaga ua tuanai atu, pei ona i ai le polokalame a le Afioga i le Minisita ma le Matagaluega ina ia faia ni Talomua a itumalo taitasi. Faafetai i lau Afioga ua ae se tofa ma se faautautaga ua le toe faia le Talomua po o le faaaliga lea sa fai tasi i tai i le malae lea, a ua avea le avanoa lea ma mea ua mafai ai e itumalo taitasi ona faaali fua o faatoaga o lo o faapea ona maua i tuafale ma tuamaota. O lea e momoli ai le agaga faafetai i lau Afioga i le Minisita faapea foi le Matagaluega i le tulaga lea.

E momoli foi le agaga faafetai i lau Afioga i le Minisita o Galuega. E manatu, sa ou talosaga muamua atu lava i lau Afioga i le Minisita, ua silafia le aafia o lenei itumalo i taimi o timuga ma lologa, ae faafetai o lea sa muamua aumai lau faamuamua i vaitafe ia agai atu i Pesega se i tau i Moamoa aua foi le amataga o lenei tausaga i timuga ma lolovai, ae faafetai o lea ua maea ona faatulaga le tulaga lea. Toe pau lava lea o le tatalo i le faaleleia o vaitafe ia, toe lava o i i le mea e iu mai i ai le tafe i tai i le sami, i tua atu lea o le SMI. O i ina lea e mafua ai ona lolovaia le taulaga i Apia,

leaga e sau le vai i uta ua lautele, ae oo mai tai i i i le mea e alu ai i le sami ua lauiti. O le ala lea o le lolovaia o le taulaga, ona o lea ua tafe mai autafa. O le mea la lea e tatalo atu ai i lau Afioga i le Minisita, ia se i silasila ane ina ia faamaea le tatou galuega lea.

Ae le gata foi i lea, ia ua maea foi ona e asia nisi o auala o lenei itumalo, faamalo faafetai. Ia o lea lava e taatia atu po o le a se taimi a o se aso o le a faatino ai, e momoli le agaga faafetai.

E momoli foi se manatu i lau Afioga i le Minisita o Leoleo, e le mafai ona galo ia te au sa afea i lau lauga i le amataga i le la tausaga, i le tulaga lea o mea o laau taavale ia e leoleoa i vaeluapo ma afiafi o taimi o sauniga ma faigalotu, lea lava ou te faalogo o lea lava e le i i ai lava se fuafuaga i ai i le vaega lea, leaga o le matou nuu i uta i Vaimoso amata atu i Apia seia tau atu i uta ia matou, ia o i ina lea e tele ina faatino ai le vaega lea, aemaise foi o isi taeao ta te faalogo mai lava i laau o isi taavale e matua matautia le leotetele.

Ia e oo foi i moli ia na ou talanoa atu ai foi, e faalavelave i isi avetaavale i le po i le sulugia o fofoga o avetaavale, ia se i faamolemole lau Afioga i le Minisita, se i silasila ane i le vaega lea.

O le isi vaega e fia taua i se faamatalaga mo le silafia e le atunuu aemaise lau Afioga, ia lele foi ua toe faateteleina le tele o taifau tataa i le taulaga aemaise le tele o nuu. E mafua i se a? Ua le toe faia le polokalame foi lele lea sa i ai le vaega lea o le Dog Control Unit a tatou i tai. A o lea ua matau atu ua le toe i ai, e le iloa po o le a le mafuaaga. Ou te manatua sa i ai le taavale sa faameaalofa mai e nisi o atunuu mo le polokalame lea, peitai ane ua ou le toe vaai foi i nei taavale, pe aisea. Ma le isi, ua tele le taifau i totonu o nuu, ua tele ina nonofo i luga o le alatele. Tasi lea mea o lea e talanoa soo mai ai le Matagaluega lea o Turisi i tagata feoi e tafafao i luga o alatele ona ua tele ina faasoese ai mea ia o taifau a aiga. O le mea la lea ou te tatalo atu ai, aua o lea foi sa i ai mea o pa ia sa vili atu e fia aumai e fia tapue ai taifau ia, ae peitai ane, na ou vili atu i le Ofisa i mea o pa ia, ae sau le tali fai mai ua le toe i ai ua uma ona gaoia e tagata, ia ou te le iloa pe mafua i se a. O le mea la lea e tatalo atu ai i lau Afioga i le Minisita o Leoleo se i alofagia se i silasila ane i le vaega lea faamolemole.

Lau Afioga i le Minisita o Eleele, ua taua lau Afioga ona o lea ou te maitaua i le taeao lea sa outou afifio atu ai i le Talomua a lenei itumalo, lena sa ou faalogo lava o saunoa le Minisita o Faatoaga i lau Afioga ia matou nei, se i talosaga atu i lau Afioga pe i ai ni eleele faaopoopo mo lenei itumalo. Silasila foi lau Afioga, o le itumalo lenei o le itumalo e tu taulaga. E leai ni eleele, ua na o se eka lava pe kuata eka lea e faatau e nonofo ai le aiga, ae leai ni eleele e galulue ai. Ia o mea sa maua i le matou Talomua, o nai faaeleleaga lava o lo o maua i tua o maota ma laoa.

O lea ou te tatalo atu i lau Afioga i le Minisita ia pe mafai ona faamatuu mai se isi 50 pe 100 eka i uta i le mea lea e taua o Laloanea, lea o lo o i ai

nisi o le matou nuu lea e galulue ai. O lea ou te vaai i uta i lenei ogaeleele, e leai lava ni mea na o vao lava ma togalaau tetele la e i ai ia ma manufeleele la e i ai ae leai se mea o galueaiina. O le mea la lea ou te tatalo atu ai i lau Afioga i le Minisita, pe mafai ona faamatuu mai nisi vaega eleele o eleele ia se i faatino ai a matou faatoaga. Ia, aemaise o lea o le a tapena itumalo mo le poloketi o le \$1 miliona, ia, tasi lea aoga o le eleele lea pe a faamatuu ai se i faatino ai nisi o poloketi a le matou itumalo. Ia o le tatalo atu lea i lau Afioga i le Minisita.

Ia ona ou oo mai lea i lau Afioga i le Minisita o Aoga, e manatu e le o toe po se lilo, sa taua foi i lau lauga i lenei tausaga ua tuanai atu, na o le 2 lava primary schools lea e i totonu o lo matou itumalo, na o i lava i Lepea ma Vaimoso. Sa talosagaina foi pe mafai ona faatu se isi primary school ona ua tele tamaiti aoga ae ua le lava faleaoga, le lava primary school. Ia ae le gata i lea, o le faleaoga foi lea e i Lepea, pei lava ona ou fai atu, ua le toe sefe mo le fanau aoga. Masalo a silasila i ai lau Afioga po o nisi foi o le Malo, ua le toe sefe mo tamaiti aoga. O lea e tatalo atu ai i lau Afioga, se i silasila ane i le vaega lea o lenei ua taoto atu le matou talosaga.

Ia, lau Afioga foi i le Minisita o le Siosiomaga, ia o lea ou te iloa ma ou manatua e i ai le Tulafono a le Malo sa faasa ai ona tanu pe tapu ona tanu mea ia o togatogo. Ia ae peitai ane, a silasila i ai i tuamaota ma laoa o lenei nuu i tua atu i tai i o i le mea lea e i ai le SMI agai atu i tai, ia ua leai ma se togatogo ua uma ona tanu uma e le aufaipisinisi. Ua leai se togatogo sa tua i ai nai aiga ia, sa maua ai le tugane, o ipo o a uma ituaiga figota sa tele ina maua ai i tua i i. Ua faigata ona fai se fuafuaga i le vaega lea, ona ua maea ona faatau motu e tagata eleele ia.

O lea e tatalo atu ai i lau Afioga i le Minisita, pe leai ni eleele a le Malo e faafesui ai ma aiga ia ae toe faamatuu mai eleele ia a le itumalo ma togatogo ia e faasao aua le fofoga taumafa o lenei itumalo ma aiga ia o lo o tua i ai. O le tatalo atu lenei i lau Afioga i le Minisita.

Ona faapuupuu atu lea o se faamatalaga i lenei afiafi, e momoli le agaga faafetai i lau Afioga i le Minisita o Tupe, malo le tautai, malo le loto atunuu, malo le mea moni o le mea nei o faigamalo. Faamalo le lima faasoa lelei, e matuai selau pasene le lagolagoina e lenei itumalo o le Tala Faatatau Faaopoopo o le Tupe i lenei tausaga. O le mea la lea e momoli atu ai le agaga faafetai i lau Afioga i le Minisita o Tupe.

E faauma atu sau faamatalaga e pei ona ou fai atu e le umi sau lauga. E momoli atu le agaga faafetai i si ou itumalo o Faleata Nu.1, aua le afio o le Faumuina, susu le Usoalii, Tamapaa, afio lau afioga Letele, maluu mai le falevalu ma le falelima o tagata tanoa, maluu mai foi oulua le nofosa o Aii ma Vaitagutu ma lo oulua vaifale ma upu i le saofaiga a Atua.

E momoli atu foi le agaga faafetai i si o matou nuu pele o Vaimoso aua le afio o le Tama a le Fale, Mataia, Susu Tama a le Fale, usoalii ma le Matua ia Patauave, ae tainane foi lo la toalua i le Tomaagauaune ma Manuleleua,

Leaogamalie ma le Fagalelefulu, Nofotama ma le malae ma le matua ia Tooala ma Tiufea ma le mamalu ia te oe Vaimoso. Ia, o mamalu ia ma paia o si ou itumalo.

E le gata i lea, ou te faatalofa atu foi i nuu le mavae o si o matou itumalo, lea o lo o afifio ai tupu ma tamalii, o tulatoa ma le aufueloloa aemaise o Samoa o lo o faapea ona papaaao ai i vaega ia o lo matou itumalo. Faamalo faafetai i la outou tapuaiga ua ae manuia ai le faamoemoe pei ona ou tulai atu ai i lenei afiafi. O lea e momoli le agaga faafetai.

E le gata i lea, o afioga i alii faifeau o le matou nuu ma le itumalo, faamalo faafetai i la outou tapuaiga, aemaise o la outou faanonomanu aua ni agaga se tele aua le Atua ma Lona finagalo.

Ia o se faamatalaga lea i lenei itula afiafi. Ia faamanuia le Atua i le tatou Malo, i lau Afioga i le Tamaitai Palemia, faapea foi lau Afioga i le Fofoga Fetalai ma le mamalu o le fonu a Samoa. Soifua ma ia manuia.

FOFOGA FETALAI: Malo faafetai saunoa i lau Afioga i le sui usufono mo Faleata Nu.1. Ou te talitonu o lea ua faafofoga foi ma le totoa le paia o le Maota aemaise le Afioga i le Palemia ma le Kapeneta i manaoga foi o si ou itumalo. Malo faafetai. Faafetai foi manatu i le itumalo, aemaise foi o nai tagatanuu o le itumalo aua lo latou soifua maloloina, aemaise foi o le soifua atinae. Malo faafetai mo le saunoaga. Ia, ou te talitonu o le avanoa lenei o lo o tuu atu pea mo se tasi o sui usufono mamalu o lo o fia sausaunoa.

Ia o lea ua matau atu pei o lea ua tulai mai Palauli. O lea ua ou vaai atu o lea o le a sauni mai le sa o Palauli Nu.3. Ia, lau Tofa Lagaia, o lou avanoa lenei.

Tofa LAGAAIA TIATUAU TUFUGA (Palauli Nu.3): E le toe tau sufia le alaseae o le tutafaitoa, pe toe tau faaoleoleina toega o le malama seia lafo i le taulaumea, leaga o galuega mamana ia o le alofa tunoa o le Silisili Ese e salui ai le soifua ma le ola. Atonu ua maea foi ona papae tia o le tautiaga pei o le faiva i malae, ae ou te faitau foi, e leai lava se tautai e mafai ona ia toe sosofa le faalao o le taiiao. E leai foi se matapalapala na te toe tapulalagaina pe toe auuina le fuesou o le tailagalaga leaga e tupu le tai, e tupu foi le vai, ae tumau lava paia ma mamalu o sa ma faiga o Samoa. E le tatua la o Malo pe toe tapue muliomalo, ae manatu foi, o le uluai Fono lenei a le Palemene o Samoa. A faalepa la i le laulai o le afiafi, e fetaii ma le tutafaitoa o le malamalama faasuaao, ina ua togo ae le fetu o ao o le malamalama o le aso fou, e i ai le uluai Fono lenei a le Palemene o Samoa. O le agaga fiafia lea ma le agaga faafetai, saga foi ai le viiga i le Atua. Faafetai ua asa le fua o pua nai aganoa ae tumalo le tasigaoa a le tausala ma le vasa. Tatou matamata i lona matagofie e ala i le soifua ma lo tatou ola ma le malosi, lea ua toe fatafata i le fatafata a le Palemene o Samoa. Ia leaga o le alofa o le Atua o le moli e mu ao e saili manu i ai le lalolagi i lona matagofie ma lona pupula, a

o le galu e faasufiata e to'a i ai le auaumalu pe a mavae matagivale. Ia saga viia le Atua ma Lona alofa faasoa.

I lenei foi aso ma le felafolafoaiga a le Palemene, e momoli atu lava le agaga faafetai ma le faamalo. Tasi o le mea, e i ai upu foi ia faaleaganuu, e auma le atola na molia i tauga, e talava ai usu ma tolo, e lepeti ai le filemu ma le nofo fealofani a le Palemene o Samoa a o faafogafoga Samoa. Ne i o tatou tusitusilima, aua foi tatou te toe asaina le ogasami ua tuanai, o le taeao lenei ma le aso lenei, o le taeao o le toe fuatai ma le tauatai, faatuanai le lape ua alu. Tatou agai i luma e saili se manuia o Samoa. Aua tatou te vaai faai'a o tainefu, a matapala ua taaaluga, le manatua, le mautonu po o luga po o lalo. Silasila faai'a o tai loloto e vaai mamao po o fea o taoto ai le filemu ma le fealofani o Samoa. O fea o taoto ai le manuia ma le lumanai o le fuaga o lalovaoa. Na pau lava lea.

Ua ou tulai ona o sau fautuaga e avatu i le tatou Maota, leaga o le Maota na fafatu ai titi e le autulatoa ma le aufueloloa, lea ua mavae. O le Maota lenei ma le malae lenei i Tiafau, na utu ai le toto masaa, ae fesootai ai paega ma alaafaga o nuu ma aiga, ae sootauau ai Samoa ma le lalolagi atoa. E mafua i se a? Leaga na to ai le ie o Tumua ma Pule, to ai manu, ae mafua o le galuega faaola a lo tatou Alii o Iesu Keriso, gase taua tu le Malo o le Atua ua mafua ai ona tatou fesootai.

O le agaga lea ma le tatalo ma le faaaloalo. E ala foi ona uumi a tatou Fono o le tatou toe foi i tua. Ae a tatou agai lava i luma ma tatou... faafetai i le... o au ou te matuai lagolagoina lava le Tala Faaopoopo o le Tupe, ma lenei itumalo. Faafetai i lau Afioga i le Minisita o Tupe, ae pau lava le tatalo, ia tautuana ma vaega uma ia ua faaopoopo le tupe, ia fai ma le fuafua, fai faamaoni le galuega, faasoa lima lelei, lufilufi limalelei. O lou itumalo, e le o tagi mai i se mea, leaga lava le itumalo e lelei, ioe, leaga e lima malosi e tamaoaiga Palauli. E le o tagi mai i se mea, na pau lava le mea la e faatali mai ai, ia vave ona avatu le \$1 miliona o le a tuai ona fai matou fuafuaga. Na pau lea. Ua uma foi le lauga a Palauli, ae pau lena o le mea ou te manaomia le fealofani o le Palemene a Samoa. O nei, taeao ma i e lua, ia viia le Atua. O le tatalo i le tatou folauga, ia aso tasi le vasa, fotulupe le vaa. Manuia le folauga Samoa. Soifua.

FOFOGA FETALAI: Malo faafetai saunoa i lau Tofa i le Matua Fetalai lau Fetalaiaga Lagaia. Ia o lea lava ua e fautua faa-tama aua foi le folauga a le tatou Palemene, ua malo faafetai. Faafetai foi le fesoasoani i sui usufono mamalu aemaise foi le Nofoa aua lava le tauavameaina o le tatou galuega ina ia faapena ona tatou galulue ma agai pea i luma le tatou sa. Faafetai mo fautuaga. O le mea sili ona taua, o lea foi ua tautino le solo a le tamaloa, leai o lo o manuia le itumalo. O le mea lea, faafetai le lagolago i le tatou Tala Faaopoopo o le Tupe, malo foi lauga faatoeaina ma fautua faatoeaina.

Ia o le avanoa lenei o se tasi foi o sui usufono mamalu. Ia, o lea ua matau atu o lea foi ua fou mai le sa o le sui usufono mamalu mo Vaisigano Nu.1 lau Afioga Niuava, o lou avanoa lenei lau Afioga i le Minisita Lagolago o Galuega Tetele.

Afioga NIUAVA ETI L. MALOLO (Vaisigano Nu.1): Faafetai i lau Afioga i le Fofoga Fetalai. Ma ua manatu le tootoo o Matia ma Matia Ituau, leaga o lea ma te sootuli ma Palauli lea ua tumuli atu, o le pule a Palauli ma le pule a Matia ma Matia Ituau ona pasia loa lea o le Tala Faaopoopo o le Tupe.

Ou te manatu o lea ua e faausu le atu o le taeao, sa e fusi foi le fau o Malo aua le Atua ma Lana taitaiga i le Palemene ma lana Fonousu. Faafetai i lau Afioga i le Fofoga Fetalai, vaeane lava le faalepa o le vaatele i le paia o sui usufono mamalu o le Palemene o Samoa. Ou te tulai lava ma le faaaloalo, e gatete foi le tino ae tautala lava ma le ava. Ou te faatalofa atu ai i lau Afioga i le Tamaitai Palemia ma le Aiga Kapeneta, e faatalofa foi i lea ituvai i le afio o Afioga i Sui Minisita. E faatalofa foi i le la ituvai i le afio o lau Afioga i le Sui Taitai aemaise foi le paia i le mamalu faaepa o lena itu.

E faatalofa foi i le tapuaiga mamalu a Samoa mai lava i le matafanua seia le siuofanua. E manatu foi o le a ou le toe ta lava i Utumaau pe ou te toe asaasaina paia ma sa o lea ua maea ona alo i le aso e sui usufono o le Palemene ua maea ona tulai.

Ou te faatalofa foi i le paia i si ou itumalo o Vaisigano Nu.1. E ui lava ina lagia Matia ma Matia Ituau, Faletagaloa ma Falepau ona o le valaau paia a le Atua i le poututoa o le sa nofoia foi le Malaefono ma Maota Fono nei, ae ou te faatuatua i le Atua ua maea ona Ia tapena le nofoaga mo i tatou. Si ou itumalo, lototetele.

O le a agai se talanoa i le Tala Faatatau Faaopoopo o le Tupe e pei ona i lumamea nei. I le vaavaai a lenei foi sui usufono, e le o se tupe tele, is a small money. Small money, small talk. Ae i ai nai vaega e fia pai i ai se lagona, o le a ou le toe asaina ua maea ona faailo i le lauga faataupou a lenei itumalo. Ae ua ou manatu a ou toe oo i ai ua faatiga taliga i Afioga i Minisita. Ae i ai vaega e tutupu mai lava i le taape o le Palemene i le la tausaga, seia oo mai i le taimi o aso fiafia. O lea e fia agai i ai se lagona, o lenei sui usufono. E manatu ua maea, sa maua foi i nisi o saunoaga, le tulaga lea i le tau o oloa, e moni ma faamaoni. Ae o le fesili ou te fia fesili ai, o fea le tatou Price Control Board? E latou te vaaia tau o oloa. A o lea e maua i suesuega ua le o toe i ai se mea lena. O lona uiga o le ala lea ua tuu saoloto ma pule ai pisinisi i le tau o a latou oloa. Ua leai se mea lea e fua i ai ia le tau o oloa a fai pisinisi. O le tatalo lea a lenei itumalo. E mai i le siusiu o Salafai e oo i ai le tiga o le tau o oloa, faamolemole toe faatulai le Price Control Board lea ina ia tutusa uma ai, pe sioki lava le moa, ia aua ne i fesiitai ia le tau lea.

Na maua i le saunoaga a le tiakono toeaina po o le Minisita Lagolago ia le taimi na tapunia ai alavaa. O le agaga lea, o le tulai o se taitai o le atunuu, e silasila le atunuu, o taulamua i luga i mea o lo o tumu ai le paia ma le mamalu o le atunuu. Ae i ai le mea na tupu ai, o lea e tatalo atu ai i lau afioga le Minisita o Vaalele. Na asia i lau talanoaga faataupou, le toe fai lea o se daily routine lea o le vaa lea mo Savaii. Na tapunia loa le alavaa, ia maua loa lou nofoaga i ina i Maota. O i ina lea sa taunuu i ai le vaa, ou te molimau atu, e 8 lelei flights tutumu mai Savaii, e 19 le aofaiga o le vaalele. Na tatala loa le alavaa le toe lele loa le vaalele. Ae na ona ou oloolopitovaa i lau Afioga i le Minisita, a i ai se flight mo Maota ma Asau, pe taitasi i le vaiaso. E tatou te amata lava i le gau, e masani loa tagata, ona pei lava o le mea fua le femalagaai o le atunuu. E fetau lelei ma le fuafuaga pe a tatala Fagalii. E lele mai Asau, tuu le taavale sau Fagalii, oso i le taavale fai le faatau, toe oso i le vaalele toe alu, e faigofie. E na ona tatalo atu faapena.

Ma le Minisita o pulea o tatou fanua. Ua faatiga fofoga foi i lau afioga le tuumumusu soo o lenei sui usufono o eleele o si o matou nuu ma si nei itumalo. E toe faafoi mai nisi eka se i agai i ai si o matou nuu i Asau ma si o matou nuu i Auala. E na ona faataoto atu faapena na ona faamanatu.

Ona faaiu lea o se lagona, e momoli le agaga faafetai i lau Afioga i le Minisita o Faatoaga. Na ou i Savaii i le taimi o le Tausaga Fou. E i ai le iniseti, masalo a o faafofoga mai lo matou itumalo, ma le itumalo o Vaisigano 2, la ua oo atu i le Alataua. E i ai le iniseti ninii la ua i ai, matua le mafai ona fai taumafataga a le itumalo, nuu ma afioaga pe a oo ina ola le moli, e fou lea iniseti. O le mea ua matauina, ua amata ona aafia ai ma tino o le fanau itu. Ona ou talanoa lea i le afioga i le Minisita, faafetai i le tali mai. O la ua agai atu ia suesuega faasaienisi, se i vaaia foi lea iniseti, ina ne i faatupulaia, ona ave lea ma toatuga i le atunuu.

Ona toe oo mai lea o se tala i le Tala Faaopoopo o le Tupe, ia faafetai tele. O le matau a lou sui usufono, o lo o lilifa lava lenei Tala Faaopoopo i le faatauaina lea o le puipua o si o tatou atunuu mai le Koviti. Ma o le tatalo foi lea a lenei itumalo, taofiofi le tatalaina o tatou borders. Se i matua atoatoa lelei, ona tatala loa lea.

Ona foi mai lea o se matou faamatalaga, ne i galo lava tae o Atua, i le tapuaiga a nai ou tama faaleagaga. O si ou itumalo o Matia Matia Ituau seia paia Faletagaloa. Ae a itu e fia o le lalolagi, o lo o faapea ona tapuai ai, alo ma fanau tupu ma ee o lenei itumalo. Ou te faatalofa atu, faafetai mo lo outou lagolago mai.

Ia manuteleina le saofaiga i afioga i Ofisa Sili o Pulega, Ofisa Sili Lagolago. Faafetai i la outou tautua, ia toa pea o outou loto, ma ia outou alolofa pea i le atunuu, e ala i lo outou matau i le Atua ma la outou galuega.

Lau Afioga i le Fofoga Fetalai, ia to manuia o le Atua aua lau faatautaiga.

Ia manuia le Fonousu a Samoa, ae ola le sui usufono a Vaisigano i le alofa o le Atua. Soifua.

FOFOGA FETALAI: Ua malo faafetai mo le saunoaga manino ma le anoa a lau afioga i le sui usufono mamalu mai Vaisigano Nu 1. Ou te talitonu foi, o lea e puupuu lava le saunoaga, a o lea lava e oo i ooooga. E taua tele le tulaga lea na laga e le sui mamalu, o le Price Control Board ma le faatauvaga. E sao, e i ai foi nisi lauga sa laugaina le tau o le soifuaga, atonu o lea foi ua taua le faailoa mai e le sui usufono. O lea e faafogafoga le Minisita i ia tulaga, ina ia malamalama atili ai pea le mamalu o le atunuu, i le tulaga o le tau o le soifuaga ua i ai nei. Ae taua le fautuaga a le sui usufono mamalu. Malo faafetai, malo lauga.

O lo o i ai lava le avanoa mo se tatou sui usufono. O lea e matau atu ua fou mai le sa o le sui usufono mamalu mai Aleipata Itupa i Luga. O lou avanoa lenei.

Afioga FUAAVA SULUIMALO AMATAGA (Aleipata Itupa i Luga): Lau Afioga i le Fofoga Fetalai, e vaavaai atu toe 5 minute ona oo lea i le tulaga faatulagaina o le tatou Fonotaga. Ae i ai foi le talitonuga ua vevela le fala, ua leva foi ona gasea lau afioga aemaise foi o sui usufono mamalu o le Fonousu a Samoa e lauliliu le Tala Faaopoopo (1) o le Tupe 2021/2022. Ae ou te tulai atu ou te tautala i le agaga faaaloalo tele.

Ou te tulai atu ai e faatalofa i lau Afioga i le Fofoga Fetalai, aemaise foi le sui Fofoga Fetalai.

E faatalofa atu foi i le Palemia ma lona auvaa le Kapeneta aemaise foi o lenei itu ma sui usufono mamalu o le Maota Fono nei.

E faatalofa atu foi i Ofisa sili o Pulega o Matagaluega, aemaise foi o Faalapotopotoga Tumaoti a le Malo. Ou te iloa foi o le taimi lenei, ua amata ona faataotolia tofaga o le mamalu o le atunuu, ae o lo o faafogafoga mai pea i le Maota Fono ma taualumaga o Fonotaga. E avea ai lenei avanoa, ma lou migao tele e faatalofa atu ai i ona paia ma mamalu o le atunuu, i ona tulaga faalupe. E talitonu o le a nona ia paia o sa ma faiga o le a le oo i ai se faamatalaga. Ae pei ona saunoa lau afioga, e manumanu lava ona o le tau faafoefoega o le Fonotaga i taimi faatulagaina.

Ae o le a taumafai atu se leo o lenei usugafono. O lea ou te faatalofa atu ai foi i le mamalu o si ou itumalo, o tupu ma ee, aemaise o faafeagaiga taulagi ma le aufaigaluega paia ale Atua i la outou tapuaiga. A e fai ia lou leo e momoli so tatou sao, e tusa ai ma le Tala Faaopoopo (1) o le Tupe 2021/2022.

Lau afioga o lea ua manino lau saunoaga, e taumafai e agai pea i Matagaluega aemaise o Ofisa o lo o faapea ona lautogia i vaega o tupe ia ua agai i ai. O le matau a lenei sui usufono, o le Tala o le Tupe e le o se tupe tele. E malie ai foi saunoaga a nisi o sui usufono, small money.

Ou te iloa foi la o le a le tele se faamatalaga, ae pei e tau agai se taumafaiga i nisi o Matagaluega, e talitonu lenei sui usufono, o lo o agai i ai isi

faamuamua a lenei itumalo. E ui lava e le o i ai i totonu o le Tala Faatatau o le Tupe.

O le a muamua se faamatalaga e auala atu i lau Afioga i le Fofoga Fetalai, agai i le Matagaluega o le Soifua Maloloina, lau Afioga i le Minisita ma le Matagaluega. O le agaga faafetai e le faaitiitia. E faafetai tele i le galulue, faafetai tele i la outou taupati i le ao ma le po. O le feagai ai o le lalolagi, aemaise o iinei i le Pasefika faapea foi si o tatou atunuu, atunuu tumaoti e toatele e o lo o gasolo ma agai mai ai, i le taumafaiga o le faamai lea e tulai mai nei. Ua matou matauina ma le agaga faagaetia le agaga faafetai, aemaise foi o le agaga alofa i le ao ma le po, o a taimi e tulai mai ai, o a taimi e fai ai tiute. Aemaise o i latou o lo o faanofoesea ona o le manumanu i afaina si o tatou atunuu. Ua malo le galulue, malo le faatoatoa, ua outou le faalogologotiga aemaise foi o le tou galulue le faatumutumulima. O lea ua sapi ai nei si outou atunuu, matou nei o lo o tui atu le mulipapaga ma taputapu ai o outou faiva. E ui foi o nisi o taimi, e tele foi lava ina sai le atunuu, ona o nisi o faiga faavae, ma nisi o taiala o lo o limataitaiina ai la outou galuega.

Ae talitonu lenei sui usufono, ia sa au le Atua i le faamoemoe. Aua po o le a foi so outou tomai, le tomai o fomai, aemaise foi o le tulaga faaneionapo. Ae talitonu lava a na le auai le finagalo o le Atua e lalago i le faamoemoe o le Matagaluega ma le Malo ma le atunuu, atonu tatou te le penei. O lea la e momoli atu ai le agaga faafetai i le tulaga lea, aua e ui lava ina tele foi sui usufono ua avatu lo latou finagalo ia aua ne i tatalaina borders ia taumafai e puipui lava si o tatou atunuu, ae o la outou fautuaga ma la outou timaiga, o le tuualalo i le Malo, ia o lea ua tali mai. E ui lava i nisi o taimi ia ae faapena ona tau faaluafesasi ona e i ai nisi ua aafia ae o lea lava tou te taumafai lava ia tausisi ma taatia i totonu o se vaega e malupuipua aua ne i aumaia i tua le tulaga o le faamai ma aafia ai le toatele o le mamalu o le atunuu. Malo le galulue.

E faaluaina le agaga faafetai i lau Afioga i le Minisita o le Soifua Maloloina, ona o le itumalo lenei o lo o i ai le falemai i le itu i Sasae o Upolu, Aleipata Itupa i Luga, ae le o se falemai e patino na o le itumalo lenei o Aleipata Itupa i Luga. O lea e afio mai lou uso a sui usufono o Aleipata Itupa i Lalo. Ua silafia foi o le aiga lenei o le fale fogafalelua o le fale i luga ma le fale i lalo aemaise foi o le itumalo o Lepa, le itumalo foi o le Afioga i le Tamaitai Palemia i Lotofaga, ia ma nisi foi o vaega o Falealili e agai atu lava e faaoga lea auunaga. I le masina ua tuanai lea sa e afio atu ai aemaise foi o le Ofisa Sili o Pulega ma le mamalu o le Matagaluega, e molimoli atu le taavale lea mo mai, le ambulance lea mo le falemai faaitumalo i Aleipata. Ia faafetai o lea ua i ai lea tulaga pei ona tatalo atu e tau fesoasoani i le taumafaiga o le galuega, aemaise foi ua tele lava tulaga ua gapatia ma aafia ai foi nisi o soifua o le itumalo i taimi ua sola, aua ou te maitauina sa ou taua i lau tautalaga muamua ona e i ai se tasi o lou aiga sa tupu ai lea tulaga, e

taumafai mai le taeao le mai ua tatau ona aumai, ia na i ai tulaga na tulai mai, faatoa toe oo atu le taavale o le a po ae ua maliu lava i tua. A o lea ua i ai lenei faamama avega. Faafetai le talimanao, faafetai foi i le alofa i itumalo o lo o taumafai mai.

Ia o le tulaga i le falemai pei ona e afio atu ma avatu foi nisi o finagalo o tapaa o le itumalo ma tatalo atu foi i le faaleleia lava o tulaga o le falemai ma lona auunaga, ia lea ua uma ona e saunoa faafetai. O lo o i ai poloketi o lo o faagasolo atu a le Matagaluega e faaleleia ai, aua e tasi lava le potu o lo o agai uma i ai mai, na o le 4 foi moega, ae i ai le tulaga foi lele e faapopoleina, aemaise foi o i e i ai uma mai aemaise o mai foi nei e pepesi, o lo o i ai foi ma nai failele ma pepe fou, ia e fai lava si maaleale o nai alo ma fanau iti ia i le tulaga foi lele i le pesia aua o le potu lava e tasi lea e i ai. E pei o le tulaga lea sa tatalo atu ai mo le tapenaga o fuafuaga lea ua faagasolo atu le poloketi, ia i ai sina ward e fai ese ai, foi lele faa-maternity ward e agai i ai failele ae faaoga le isi ward mo mai foi nei e faataotolia. O le tele foi o nisi o mai ia e pipisi e i ai le flu ma tulaga, ia e ono aafia ai ona e alu atu le mai e tau feoloolo, ae ua nonofo faatasi loa i le potu e tasi e ono pepesi ma tulaga faapea. O le agaga faafetai lena.

O le vaavaai atu i le tulaga o le Tala Faaopoopo (Nu.1) o le Tupe, e le o i ai se allocation po o se tulaga o se tupe faaopoopo i le Matagaluega. Ia, ae vagana ai i lalo o poloketi ia o lo o i ai meaalofo foi nei tupe faamealofo mai paaga, lea e agai i lalo o le tulaga foi lele o le Koviti-19.

FOFOGA FETALAI: Ou te vaelupeina le saunoaga matagofie a lau Afioga i le sui usufono mamalu, talu ai ua tatou taunuu i le tatou taimi manava, o lea ou te faamalulu atu ai i lau Afioga i le sui usufono mamalu, tatou talo soifua ia i le alofa ma le agalelei o le Atua ina ia momoli atu lo outou soifua i le aso a taeao ona maua lea o avanoa e faaauau ai lau saunoaga.

Ae tatou te le i tolopo e fia faaleo le agaga faafetai i le paia o le Palemene ona o lo outou onosai ma le lavapapale ua auomanu ai le tatou fonotaga i lenei aso i le amata mai lava i le taeao seia oo mai i lenei taimi o le po. Lau Afioga i le Palemia, lau Afioga i le Sui Palemia, le paia o le Kapeneta faapea le paia o Minisita Lagolago faapea foi lea Itu o le Maota i le afio o le Afioga i le Sui Taitai ma le Itu Agai, aemaise o sui usufono mamalu uma o le Palemene, ia ua faamalo le usufono. Faafetai mo tuleiga ma saunoaga o lenei aso. Faafetai foi i lo outou amanaia o se taumafai atu a le Fofoga Fetalai. O le a foi se leo ua paopapa o le Nofoa, ia, ala ia i le tua e pei o upu i lea itulagi.

Le tapuaiga a lau Afioga i Le Ao Mamalu o le Malo ma lau Masiofo, le Sui Tofia ma le Faletua, le paia i itutino fefaatauagai o le tatou Malo, le afaigaluega o le Talalelei, aemaise o Samoa i ona paia faaleaganuu, ua faamalo tapuai faafetai tatalo ua iu manuia le fonotaga a lau Palemene ona o lau tapuaiga mana. Afai ua sala se gagana a lau Palemene, alofa ma faatafea i nuu le aina. Ia agalelei le Atua i faiga malologa o lenei afiafi.

E fia momoli atu foi se faafetai i le paia o Ofisa Sili o Pulega o Matagaluega ma Faalapotopotoga Tumaoti uma a le Malo, o lo o outou faaaogagase pea ona o le faatauaina o lo outou valaauina, aua o outou lava e faamoemoe ma tua i ai le Malo ma le Palemene. Malo le onosai, malo le faatoatoa.

E le faagaloina foi le auaunaga faifaipea a Malu o le Malo ma le Pulega o Tinei Mu mo le puipuia o le saogalemu o le Palemene. Malo faafetai tautua Palemene. O toe upu a le Nofoa, pe a afifio ma talaaao atu i lenei afiafi, ia faalaolao e le Atua peau o le ala o le a uia, ia momoli atu le soifua i aiga ma itumalo o tapuai mai, a o le viiga e foi atu pea i lo tatou Atua.

Ae tatou te le i tolopo, ou te talosaga atu ma le agaga faaaloalo i lau Afioga i le sui usufono mo Safata Nu.1 e te saunoa se tatalo e faaiu ai le tatou Fono.

Na tolopo Taulumaga a le Fono Aoao Faitulafono i le itula e 10:05 i le po seia aulia le itula e 9:30 i le taeao o le Aso Tofi, 20 Ianuari 2022.